

1 Corintios

**Corinto llactaibi tiyac quiriccunama
Pablo cai cartata quillcasha cachan**

1 ¹Yaya Dios munashcamanda Jesucristo japihuara pahua shimita camachigrichun nisha. Náuca Pablo ñucanchi quiric huauqui Sostenes nishcahuan cai cartata quillcasha cachaunchi. ²Tucui canguna Corinto llactaibi tiyac Diospa runaguna muntunma cai cartata cachaunchi.

Canguna Jesucristota quirishcamanda Yaya Diosmi cangunata pahiuaglla causachun nisha japira. Chasnallata tucui Señor Jesucristota mañaccunaga maibi tiyaushahuas tiyanmi. Paimi cangunatas ñucanchitas jatun mandac man. ³Cunan Yaya Dios ñucanchi Señor Jesucristohuas cangunata llaquisha mana manzharina cungailla causaita cangunama cuchun nishami tapunchi.

**Náucanchi Señor Jesucristohuan
purisha causanamanda**

⁴ Jesucristomanda Yaya Dios cangunata ashcata llaquishcaraicu caran cutin pahuan cuintasha paita pagrachu nini. ⁵Canguna Jesucristohuan shuglla tucushcamanda Dios canguna tucui causaibi yapa alita yanapashca canguna ali yuyaihuan rimangahua, tucui alita yachangahua. ⁶Cunan canguna chasna ali yuyaihuan

ali shimihuan causaunguichimi ñucanchi Cristomanda yachachishcata ali uyahcaraicu. ⁷Chasnallata Señor Jesucristo shamusha ricurinata chapasha causaunguichimi. Chasna chapacpi Dios cangunata cushcaga mana imahuas pishingachu pai munashcata ushaihuan rangahua. ⁸Puchucai punzhagama paimi cangunata yanapasha sinzhiyachinga. Chasna racpi Señor Jesucristo bulltiamuna punzhaibi canguna jucha illac angaraunguichi. ⁹Caita yachanchimi Dios munashcamandami ñucanchita japira pahua churi ñucanchi Señor Jesucristohuan pariu causachun nisha. Chasnallata yachanchi pai rimashca shimi sirtu pactaringami, paita quirinalla man.

**Quiriccuna chaupirisha
chicanayashcanguichi**

¹⁰Tucui quiriccuna, ñucanchi Señor Jesucristo niucshinami cangunataga casna rugauni shuc yuyaillahan causaichi huauquiguna. Ama caran amu chicanda yuyarichichu randi shuc shungullahan pariu yuyarisha causaichi. ¹¹Cunan canguna caran amu chicanda yuyarisha piñanacusha mana alita cuintanacunguichi. Cloehua ailluguna rimahuanaura quiriccuna chasna tucunguna nisha huauquiguna. ¹²Chasnami yachin. Maicanguna Pablota uyac manchi

ninguichi. Shuccuna Apolosta uyac manchi ninguichi. Shuccunaga Pedrota uyac manchi ninguichi. Shuccunaga Cristollata uyac manchi ninguichi.

¹³Imaraicuta chasna ranguichi.

Cristo chaipirishcachu an. Ñaucachu cangunamanda cruspi huañura. Ñáuca shutihuan bautisarishcacharanguichi.
¹⁴Canguna muntunmanda mana pitas bautisaranichu, chimanda cushiyani.

Ishcaillata (2) bautisaraní Crispota Gayotas. ¹⁵Chasna acpi pihuas rimanata mana ushanzhu ñuca Pablo shutihuan bautisarishca ani nisha. ¹⁶Chasnallata Estéfanascunata bautisaraní randi ñuca ricupi mana mas bautisaranichu yachin. ¹⁷Ricuichi. Cristo mana cachahuarachu bautisagri nisha, randi Diospa quishpina shimita yachachigri nisha cachahuara. Chasna yachachisha mana runa yachashca yuyaihuanzhu camachini. Ñáuca chasna yapa yachaushca shimigunahuan chapusha camachicpiga Cristo cruspi huañushcami nisha yanga anma.

**Cristo alita ricuchishcamí
Diospa ushitas yuyaitahuas**

¹⁸Ñaucanchita quishpichingahua Cristo cruspi huañushcami nisha yachachini. Chi ucupachama riuc mana quiriccuna chi Diospa quishpina shimi yanga man nisha yuyarinaun. Randi quirisha quishpichitucuucunaga chi shimiuhuanmi Diospa ushita charinchi nisha yachanchi. ¹⁹Diospa shimi unai ñaupa quillcashca nin:

Cai mundumanda yapa yuyaiyuc runa yachachishcagunataga huaglichishami.

Yapa yuyaiyuc agllaita paigunata pishi yuyaiyucta churashami nisha Dios nin paihua shimbí.

²⁰Chasna acpi caita yuyarichi. Cai mundui ashca quishpichina shimiuguna

tiyanzhu. Mana. Dios tucui chi shimigunata upacuinta tucunata rashca. Chi yapa yuyaiyuc runaguna, mandashcagunata yachachiccunahuas, cai mundumanda yachaccunahuas ñucanchi rimashca shimita pactachisha quishpichishca tucunguichimi nishami yanga rimaunguna. Chasna rimallaita Dios paiguna yuyarinagunata upacuinta tucunata rashca.

²¹Ñáa runaguna quiquin yuyaillahu Diosta yachanata mana ushanaurachu yapa yachac ashallata. Astahanbas Dios sirtu yuyac asha pai chicanda quishpichingahua casna rara. Paihua quiquin shimiuhuan tucui runagunata quishpichinata munara. Chi shuccuna Diospa shimi yanga man nigllaita chi camachishca shimiuhuanmi paita quiric runagunata quishpichinata munara. ²²Israel runaguna mana-israel runagunahuas quirinata mana munanaunzhu. Israelgunaga pihuas mana rashcagunata ushaihuan ricuchihuai ñucanchi sirtu yachangahua ninaun. Mana-israel griego runagunaga mushuc yuyaigunata yachachihuai ñucanchi mas yachangahua ninaun.

²³Ñaucanchiga Cristo cruspi huañushcamandallami yachachinchí. Chasna yachachicpi israelgunaga cruspi huañushcami runata quirinata pinganayaita man nisha mana quirinaunzhu. Chi mana-israel runagunahuas mana quirinaunzhu chi shimi yanga asha mana balicchan nisha. ²⁴Astahanbas Dios japisca runagunaga israel ashas mana-israel ashahuas casna alita yuyarinchi, Cristoga cruspi huañusha Diospa ushaihuc actas yuyaiyuc actas alita ricuchira. ²⁵Runaguna ninaun Diospa yuyaiga yangami an, randi runamanda Dios yali yuyaiyuc anya. Paiguna

Diospa ushai mana pactanzhu ninaun randi runamanda Dios yali sinzhi manya.

**Mundu mana balichishca
runagunata Yaya Dios japon**

²⁶Cangunallata yuyarichi huaquiguna. Dios cangunata japira paihua runagna tucuchun nisha. Ñáa cangunahuacpi mana yapa yuyaiyuc runagna tiyanauzhu. Canguna muntunbi mana yapa amuguna, mana yapa mundu balichishca runagna tiyanauzhu.

²⁷Chasna acpi Dios runagunata japiشا mana cai mundu yuyaiyuc runagunataga japiroami yuyaiyuc runagunata pingachingahua. Chasnallata mana ushayuc runagunataga japiroami ushayuc runagunata pingachingahua. ²⁸Mundu mana balichishca runagunatas, mundu mana munashca runagunatas, ima mana ricuriccunatas Dios japiroami mundu balichishcagunataga yangayachingahua. ²⁹Chasna racpi mana pihuas paihuacpi balic mani nisha alabarinata ushanzhu.

³⁰Cangunaga Dios munashcamandami Jesucristohuan shuglla tucusheca anguichi. Jesucristo cangunamanda huashcamata quirisha Diospa yuyaitami charinguichi. Paimandami Yaya Dios ñucanchi juchata perdunasha anchuchi man ñucanchi paihuacpi jucha illac tucuchun nisha. Paimi ñucanchi causaita Diospacpi sumacta alichiun, jucha mandashcamandas ñucanchita lugaryachin. ³¹Chasna unai ñaupa Diospa shimibi quillcashca ara casna nisha:

Shuc runa pai rashcagunamanda ali mani nisha alabarinanda randimanda

Dios rashcagunamanda
cushihuan rimachun nin.

**Cristo cruspi huashcamanda
camachina**

2 ¹Ñaucaga huauquiguna, cangunahuacpi pactasha Diospa shimita camachisha mana yapa yuyaiyuc runa rimashcacuinta ni runa yachaushca shimigunahan mana camachiranichu. ²Randi cangunahuan aushcai tucui shuc yuyarinagunata saquisha Jesucristollata yuyarisha nirani, pais cruspi huashcallata yuyarisha causarani. ³Ñáa cangunahuagma shamusha yapa manzharisha shungu chucchurishcashina mana sinzhicuinta shamurani. ⁴Diospa shimita camachisha mana runa yapa yachaushca shimihuanzu camachiran, mana yapa yuyaiyuc runacuintachu, astahuanbas Diospa Samai ushaihuanmi camachiran canguna quirinauchun nisha. ⁵Chasna camachiran canguna mana runa yuyaihuanzu Diosta quiric tucuchun nisha randi Diospa ushaita yachashami paita quiriccuna tucunauchun nisha camachiran.

**Diospa Samaillahuhanmi
Diospacta yachanalla**

⁶Ñáa manachu Diospa yuyai an. Diosta alita yachac runagunahuanmi Diospa yuyaimanda cuintanchi. Chi shimiguna mana runahua yuyaichan, randi Diospa yuyai man. Diospa yuyaiga mana cai pachamanda runahua yuyaicuintachu, chasnallata mana cai pachata mandaccuna yuyaishinachu. Chi amuguna munduibi causashcahuasha manachu tucurinaunga.

⁷Callari uraspas, mundu mana tiyashca urasllata Yaya Dios ñucanchita

quishpichingahua yuyarishcami
 ñucanchi paihuan ali causanauchun
 nisha. Ñáupa paihua yuyai
 pacashcacuinta ara randi cunanga
 chita yachasha cuintanchi. ⁸Cai
 pachata mandaccuna Diospa yuyaita
 mana intindinaurachu. Paiguna
 yachashca ashaga tucuita mandac
 sumac Señor Jesusta cruspi mana
 huanchinaunma anaura. ⁹Chasna acpi
 Diospa shimbí unai ñaupa quillcashca
 casna nisha:

Diosta llaquic runagunama pai
 yapa ali charishcata cungami.
 Cunangama pis ñahuiahuan mana
 chita ricushcachu,
 rinrihuan mana uyashcachu,
 shungüibis mana yuyarishcachu
 pai cungaraushca yapa
 ali ashcamanda nisha
 quillcashcami.

¹⁰Chasna agllaita Yaya Diosca paihua
 Samaita ñucanchi shungüibi churacpi
 paimi ñucanchima cungaraushcata
 yuyachin. Ñáa Diospa Samaiga mana
 yachaibaccunata yachasha Yaya
 Dios quiquin yuyariushcata tucuita
 yachan. ¹¹Ñáa shuc runa shucpa
 yuyarishcata mana yachanzhu,
 amullami yachan. Chasnallata Diospa
 Samailla Dios yuyarishcagunata alita
 yachan. ¹²Yaya Dios mana mundu
 yuyaita ñucanchima cushcachu. Randi
 Diospa Samai yuyachishcahanmi,
 Yaya Dios ñucanchita llaquisha
 cumbirashcagunata yachanata
 ushanchi. ¹³Chasna ashami
 Diopsgamanda yachachisha mana
 runa yachaushca shimiuhuanzu
 yachachinch. Astahanbas Diospa
 Samai ñucanchita yachachishca
 shimigunataga yachachinch. Chiraicu
 Diosta ali yachauc runagunahuan
 sirtu Diopsgamanda yuyarishcata
 yachachinch.

¹⁴Mana quiriccuna Diospa
 Samaita mana charisha pai imata
 yuyachishcatas mana uyanauzhu,
 yanga shimi man nisha mana imatas
 intindinaunzhu. ¹⁵Astahanbas
 Diospa Samaita charic runagunaga
 tucuita ricusha ali ashcatas mana ali
 ashcatahuas yachaungunami. Chasna
 acpihuas paiguna rashcagunata
 ricupihuas paiguna shungu ucui
 ashcata chi mana quiriccuna mana
 yachanata ushanaunzhu. ¹⁶Ñáupa
 uras Diospa shimbí casna quillcashca
 an:

Diospa yuyaigunata pita yachan,
 Diosta yachachinata pita ushan
 nin.

Chasna agllaita ñucanchiga
 Cristota quiriccuna asha Cristo
 yuyarishcagunata yachanchi.

Diospecta rauc runaguna pariú ashcamanda

3 ¹Ñáuca cangunahuan
 tiyashca uras Diospa
 Samaita uyauc runagunata
 rimashcacuinta mana usharanichu
 cangunahuan chasna rimangahua
 huauquiguna. Astahanbas
 canguna aicha munashcata raucuna
 ashcaraicu Cristota mana sinzhi
 quiriccunatacuenta cangunata
 rimarani. ²Ñáa llullu huahuagunaga
 sinzhi micunata mana micuc asha
 chuchullahuhan causaungunami.
 Chicuincallata canguna sinzhi
 yachachishca shimita chara mana
 uyac acpi ansa yachachinata
 cuantarani. Cunangama canguna
 chara sinzhi yachachishcata
 uyanata mana ushanguichichu.
³Chara aicha munashcata raucuna
 anguichi. Pariu mana alita yuyarisha
 mana alita rimasha chican chican
 tucushcanguichi. Chimanda yachanchi

aicha munashcata raucuna anguichi, Diosta mana quiric runacuinta puriunguichi.⁴ Maicanguna ñucanchi Pablo runa manchi ninguchi, shuccuna ñucanchi Apolospa runa manchi ninguchi. Canguna chasna rimasha manachu camba aicha munashcata raunguichi.

**Canguna Diospa
chagracuinta anguichi**

⁵ Yuyarichi. Pitan Pablo. Pitan Apolos. Ñaucanchiga Diosta sirbic runalla manchi. Pai caran runa tarabanata cushcacuinta chillata raranchi. Chasna acpi ñucanchi Diospa shimita camachiipi manachu Cristota quiriranguichi.⁶ Ñaucaga Diospa shimita camachisha muyuta tarpuccuinta arani. Apolosca chi tarpushcagunata cuiraccuinta asha cangunata mas yachachishca. Randi Diosca chi muyuta huiñachisha mirachishca.⁷ Tarpuc runa, muyuta cuirauc runahuas manachu yanga an. Dioslla huiñachic ashcamanda tucuita rauc man. Paillata yuyarichi.

⁸ Tarpuc runas muyuta cuirauc runas pariu aunguna. Chasna agllaita caran amu rashca tuputa Dios pagashcacuinta cungami. Paiguna ali tarabashca acpi Dios alita pagangami. ⁹ Ñaucanchihuas Apolospas Diospecta rasha paihuau pariu tarabaccuna anchí. Ñáa canguna shungüibi Dios tarabacpi paihua chagracuinta anguichi.

**Canguna Diospa
huasicuinta anguichi**

Chasnallata huasicuinta anguichi. Diosca paihua munaita cangunahuacpi rasha huasita shayachishcacuinta ran.¹⁰ Jesucristota quirinamanda cangunata camachingahua callariraní canguna ali huasicuinta tucuchun

nisha. Dios ñucata llaquisha ali yuyaita cuhuashcaraicu huasita punda shayachic runacuinta mani, huasha shuccuna Diospa shimita mas yachachisha chi huasita mas jahuamacuinta shayachisha riunguna. Caran yachachic runa alita yuyarisha yachachinauchun.¹¹ Ñáa pundaga Jesucristomi, pai punda sinzhi istandicuinta acpi shuc illanmi. Mana pihius shuc punda istandita churanata ushanzhu.

¹² Huasha chi huasita shayachic runagunaga caran shuc ali sinzhigunahuan baliccunahuan shayachinata ushanaun, curihuan cullquihuan rumihuancuinta. Maicanguna mana alita shayachinaun mana unaita durana ruyahuan, chindahuan, yanga pangahuancuinta shayachinaun. Chicuinta Diosmanda yachachinata camachisha maicanguna ali yachachinaun, maicanguna mana ali yachachinata yachachinaun.

¹³ Randi puchucuai punzha pactacpi caran amu rashcaguna ricuringami. Chi punzha Diospagmanda nina tucui rashcagunata rupachisha camangami ima tunu acta ricuchingahua.¹⁴ Maican runa mana rupaibag huasita shayachishcacuinta rasha chi alita rashcagunamanda alita pagaitucungami.¹⁵ Chi mana alita shayachic runaga ninamanda quishpingami randi pai rashcagunaga rupashca tucusha mana imahuas puchungachu.

¹⁶ Yuyarichi. Manachu yachanguichi Diospa Samai cangunahuacpi causaun. Chasna causashcaraicu Yaya Diospa huasi manguichi.¹⁷ Maican runa Diospa huasita huaglichicpi Dios chi runata huaglichingami. Chasna rangami paihua huasi yapa ali sumac ashcaraicu. Ñáa cangunaga

Yaya Diospa quiquin causana huasi
manguichi.

Diospagmada yuyaita yachaichi

¹⁸Cangunallata ama umasha
pandaringuichichu. Canguna
cai mundu yachachinata yapa
yachashcaraicu yapa yuyaiyuc manchi
nisha yuyarisha pandaringuichi.
Astahuantas cai mundumanda
yachaita saquichi Diospagmada ali
yuyaita yachangahua. ¹⁹Diosca nin cai
mundumanda yuyai paihuacpi yanga
man. Paihua shimibi quillcashcamí
casna nisha: Paiguna quiquin
yuyarinagunahanlla Dios chi
yuyaiyuc runagunata muduyachingami.
²⁰Chasnallata israelgunata mandac
ñupa causa rey amu David chicuinta
quillcashcamí: Jatun Diosca chi
yachaucuna yuyarinaguna yanga
manaun nin.

²¹⁻²²Chiraicumanda maican canguna
ñuca Pablohua runa mani nishaga,
ñuca Apolospa runa mani nishaga,
ñuca Pedrohua runa mani nishaga
yanga yuyarishcanguichi, tucui
ñucanchi runa ashcaraicumanda.
Runa acpi ama ñucanchita yapacta
balichichichu. Randi casna yachaichi,
llambuguna tiyanchimi cangunata
yanapangahua. Náucahuas Apolohuas
Pedrohuas, cai munduhuas, causaibas
huañubas, cunan tiyanahuas
huasha tiyanahuas, tucui imahuas
cangunahuagmi aunguna cangunata
yanapangahua. ²³Chasnallata
cangunaga Cristohuac manguichi,
Cristoga Yaya Diospac man.

Dios cachashca runa tarabana

4 ¹Casna tucui runaguna
ñucanchimanda yuyarinami
anaua Jesucristota yanapac
runa anauta. Cristo cachashca

runaguna anchi Diospagmada
unai ñupa mana yachashcagunata
yachachingahua. ²Chasna shuc
cachashca runa paita mandac
runa rimashcallata pactachinami,
manachu. ³⁻⁴Náuca pactachicpi mana
pactachicpiga ñucanchita mandac
amu Señor Jesus yachan. Canguna
shuccunas ñucamanda imatahuas
yuyaricpi ñucahuacpi mana imaschu.
Náucallatahuas mana amuta
yuyarinichu. Cunan ñuca causaibi ima
jucha rashcata mana tupanichu, chasna
ashallata ñuca ali mani rimanata mana
ushanichu. Dioslla ñucata yachan.
⁵Señor Jesucristo shamungamiraun,
ña pai pactamushca uras tucui pacalla
rashcagunatahuas tucui shungübi
yuyarishcagunatahuas ricuchingami.
Chi punzhagama ama camba shungu
ucui yuyaringuichichu chi runa
mana alita rashca nisha. Caran amu
rashcamanda Diosllata rimangami
yapa alita rashcangui nisha ashillata
rashcangui nisha rimangami.

⁶Náucamandas Apolosmandas
rimashcani huauquiguna, canguna
imasna ranatas yachanauchun nisha.
Canguna shuc yachachic runata
balichisha shucta mana balichisha
ama chaupichishcacuinta chicanda
ranguichi, astahuantas Diospa shimibi
quillcashcallata yuyarichi. ⁷Cangunaga
tucui shuc runacuina talla anguichi,
tucui can charishcagunataga Dios
cushcamí. Dios canda cushcaraicumi
imahuacta camballata yuyaringuichi
ñuca shuccunamanda yali balic mani
nisha alabarlungahua.

⁸Manachu yuyariunguichi pacta
yachanchi, tucuita charic anchi nisha,
mana Pabloguna yanapacpihuas yali
manchi nishachu yuyariunguichiya.
Canguna sirtu mandac amu tucusca
acpiga ali anmaya. Chasna ashcaibiga

ñucanchihuas cangunahuan pariu mandanata ushanchima.⁹ Jesucristo ñucanchita japisha camachigrichun nisha cachashca runa ashallata runagunahuacpi mas ucuma anchi. Culpayachishca huanchina runagunatacuenta Dios rahuashca yachin llambu runaguna ñucanchita pugllangahua. Chasna tucushcanchi runagunahuacpi angelgunahuacpihuas.¹⁰ Náucanchi Cristomanda shimita camachishcaraicu mana yuyaiyuc anguichi nisha ñucanchimanda rimaunguna. Astahanbas cangunaga Cristohuacta yapa yachanchimi nisha yuyaringuichi yachin. Náucanchiga api sambacuenta anchi, cangunaga ushayuc aunchi nishachu yuyaringuichi. Canguna balichishca anguichi, ñucanchi randi mana balichishca anchi.

¹¹ Tucui uras ñucanchi micuna pishin, upinahuas pishin, churanahuas pishin. Náucanchita piñasha yapa macanaun. Huasihuas illac asha maibihuas puñunchi.¹² Náucanchi maquihuan sinzhita tarabasha turmintarinchi. Runagua ñucanchimanda mana ali shimita rimanaupi randi paigunamanda Diosta mañanchi paigunata alita rachun nisha, ali shimihuan cutipanchi. Paiguna ñucanchita yapa turmintachinaupi randi ñucanchi ahuantanchillami.¹³ Náucanchimanda llullacpiga mansu shimihuan rimanchi. Náucanchita jiridsa basura actacuenta yuyarinaun, cunangamas paigunahuacpi jichunalla anchi.

Ñáuca canguna yayacuinta ani

¹⁴ Caita mana quillcanichu cangunata pingachingahua randi ñuca llaquishca huahuagunatacuenta cunauni.
¹⁵ Náucami chi Diospa quishpina

shimita rimasha canguna quirinauchun nisha yachachirani. Chasna canguna Jesucristota quirishcaibi canguna yayacuinta tucurani. Yapa ashca shuccuna Jesucristomanda cangunata yachachigllaita chunga huarangata (10.000) charicpihuas ñucalla canguna yayacuinta mani.¹⁶ Chiraicu ñuca causashcacuinta causaichi nini.¹⁷ Canguna chasna causangahuaca Timoteota cangunahuagma cachauni. Pai Señor Jesusta alita quiric man, ñuca llaquishca churicuinta man. Náuca imasna Cristohuan causaushcata, ñuca imasna caranbi tucui quiriccunata yachachishcetas, pai cangunata cuti yuyachingami.

¹⁸ Maican runaguna amullata yuyarisha ñuca yali ani nisha rimaccuna Pablo manzharisha mana caima pasiangahua shamungachu nisha rimanaun.¹⁹ Astahanbas Dios munacpi mana unayasha cangunahuagma shamunata munani. Náuca shamusha paiguna ñucanchi yali ushanchi nisha rimashcata yachashami sirtuchu ushaihuan imatahuas rashcata yachashami.²⁰ Diospa ali mandanai auc runagunaga mana rimashca shigmigunallahuan causanaunzhu randi Diospa ushaihuan causaushcata ricuchinaunmi.

²¹ Chasna acpi imatata yuyariunguichi. Canguna alita yuyaricpiga ñuca shamusha llaquishcahuanmi cangunata ali mansu rimanata ushani. Randi canguna mana cambiasha causaucpi ñuca cangunata libachishcacuinta sinzhita rimashami. Maicandata munanguichi.

Ashiyana yapa mana alichu

5 ¹ Cangunahuacpi shuc runa yapa jiridsata rashcamí paihua yaya huarmihuan ashiyasha nishcamí nin.

Chi tunu juchata chi mana quiriccunas mana rashcaunachu. ²Chi jucha tiyacpis chara ali manchi ninguichichu. Chasna rimana randimanda yapa llaquirina manguichi. Chimanda chi juchata rac runata cangunahuagmanda anchuchinami. ³Náuca mana chibi tiyaushallata randi ñuca chibi aushcacuinta chi runa jucha rashcata yachasha, paita cangunahuagmanda cachanami nini. ⁴⁻⁵Canguna ñucanchi Señor Jesucristo shutihuan tandardishcai ñuca cangunahuan tiyashcacuinta, Señor Jesucristo ushaihuan chi runata Satanás japichun nisha rimaichi pahua aicha munaiguna chingaringahua. Chasna racpi Señor Jesucristo shamushcaibi pahua causai quishpishca tucungami.

⁶Canguna yapa ali manchi nisha alabarishallata mana balinzhu cangunahuacpi jucha tiyashcaraicu. Manachu rimanaun ashicua putasyachishcaga intiru panda putasyachin. Juchaga chi ashicua putasyachishcacuinta intiruta huaglichin. ⁷Chasna acpi rucu putasyachinashina juchayuc rucu causaita jichusha illacta jichuichi mushucta rashcacuinta tucungahua. Quiriccuna sirtu mushuc yuyaiyuc anchi. Cristoga pascua punzha Diosma ricuchina ovejatacuinta huanchishca an ñucanchimanda juchata anchuchingahua. ⁸Chimanda ñucanchi pascua jistata rashcacuinta mushuc yuyaiyuc asha alita causanami anchi. Tucui jucha ranaguna tucui jiridsa yuyarinaguna auruyashca mana upibacasuacuinta man. Ama chasna causanguichichu. Randi ali asua accuinta ali yuyaihuan sumacta causanami anchi mana llullasha.

⁹Chi ñaupa cangunama quillcashca cartaibi cangunata rimarani ashiyasha

causaccunahuan ama puringuichichu nisha. ¹⁰Cai munduibiga tucui mana quiriccunaga manachu juchata rausha causaunguna. Manachu ashiyaccuna, cullquita yapacta munaccuna, shuhuaccuna, shuc dioscunata caticcunas aunguna. Mana rimanichu chasna puriccunahuan ama rimaichichu nisha. Paigunahuan mana cuintana acpiga cai mundumanda llucshinguichimami. Chita mana rimanichu. ¹¹Randi caita rimani, shuc runa ñuca Jesuspa runa mani niushahuas ashiyasha causacpiga ama paishuan puringuichichu. Chi ashiyasha causac runa, cullquita munasha mitsac runa, shuc diosta catic runa, jiridsata rimac, llullac, machac, shuhuac, tucui chicuinta rasha causaccunahuan ama puringuichichu. Jesusta quiric mani nishallata pai chasna causacpi ama paishuan micunguichichu.

¹²⁻¹³Mana quiric runa jucha rashcagunata mana taripanichu. Diosmi paigunata taripanga. Canguna randi quiricpura mana ali causauta ricusha yachashami taripanami anguichi. Chiraicu Diospa shimi rimashcacuinta chi ashiyasha causac runata cangunahuagmanda anchuchinami anguichi.

Quiriccunapura alichinamanda

6 ¹Quiriccunapura piñanacupi ama amuhuagma risha alichinachun nisha amu mana quiric ashcaraicu. Astahanbas quiriccuna ñaupagllaita alichinami anguichi. ²Yuyarichi. Puchucai punzha tucui munduibí tiyac runaguna juchata rashcagunata yachashami quiriccunaga alita taripangaunami. Tucui mundutu canguna taripangaraushaga manachu ushanguichi cunán uras cangunahuacpi ashillagunata

alichinata.³ Chasnallata angelguna imasna rashcatas yachashami taripangamirauchi. Jahuapachaibi rashcagunata taripangaraushaga imaraicuta mana ushanguichi cunan uras munduibí rashcagunata alichinata.⁴ Chita rangaraushcata yachasha cangunapura ima piñanacushcagunamandas alichina acpi imahuacta mana quiric runahuacpi alichishun nisha ringuichi.⁵ Chitaga rimani cangunata pingachingahua. Cangunahuacpi manachu tiyan shuc yuyaiyuc runalla quiric huauquipurata alichingahuaca.⁶ Shuc quiric runa pahua quiric huauquita piñasha imahuacta shuc mana quiric amuhuagma ringuichi alichishun nisha.⁷ Piñanacusha amuhuagma caudsayachingahua rishaga cangunapura mana alichinata ushac aucunata ricuchinguichimi. Chasnacracpi manachu pingarinalla. Shuc quiric huauquita binsina randimanda mas ali anma can ahuantasha binsiticupci, quichuitucuphiwas.

⁸ Astahuuanbas cangunapurami mana alita raunguichimi, pariumanda shuhuanguichimi, quiricpura ashallata.

⁹ Manachu yachanguichi mana alita raucuna Diospa ali mandanama mana yaicungachu. Amullata ama llullaichichu. Llambu juchata rasha puriucuna, yanga diosta mañaccuna, ashiyaccuna, caripura llutariccuna,
¹⁰ shuhuaccuna, cullquillata yuyariccuna, machaccuna, camisha llullaccuna, umasha ganaccuna, pihuas chasna rasha causaccuna Diospa ali mandanaibi mana yaicungachu.
¹¹ Cangunahuacpis maicanguna ñaupa chasna rasha causaranguichi. Cunanga juchamanda maillashcacuinta limpio anguichi, camba shungu camba

yuyaihuas aliyashcacuinta mushuc tucushcanguichi Diospacpi ali sumac. Señor Jesucristo shutihuan Diospa Samaihuan ña lugar anguichi ñucanchi Diospa runa tucushcamanda.

Ñaucanchi aichahuan ali causanami

¹² Ñáuca lugar asha ima munashcatas ranalla nisha maicanguna rimanaun. Chasnac agllaita mana tucui munashca ranaga ñucanchi ali causangahua yanapanzhu. Tucuita ranata ushshallata lugarta mana cunichu ima ranahuas ñucata mandasha binsichun nini.¹³ Chasnallata rimanaun, Micuna illacpi huicsa mana balinzhu, chasnallata huicsa illacpi micunas mana balinzhu ninaun. Diosca ña ishcandita (2) chingachisha tucuchingami. Ñaucanchi aichaga balinmi Señor Jesuspacta rangahuaca. Chiraicumi ñucanchi aichahuan mana ashiyanachu. Señor Jesusca ñucanchi aichata mandac amumi an.¹⁴ Señor Jesusta huañushcamanda cuti causachic Yaya Diosllata pahua ushaihuan ñucanchitahuas cuti causachingami.

¹⁵ Tucui ñucanchi aichagunata Cristo japishcamí pahua quiquin aicha tucuchun nisha. Chita manachu yachanguichi. Ñáuca aichaga Cristohua aicha ashcaraicumi imasata ashiyanata ushani. Manapacha, chasnata mana yuyarinachanchi.¹⁶ Manachu yachanguichi shuc runa shuc ashiyachic huarmihuan llutarisha paigunapura shuc aichalla tucunaun. Chimanda Diospa shimibi quillcashca ara, ishcaiguna shuc aichalla tucunaungami.¹⁷ Chasnallata ñucanchi Señor Jesucristota quirisha shuc shungucuinta tucusha pahuan shuglla tucunchi.

¹⁸ Chasnac acpi ashiyanamanda miticusha callpaichi, ama chasna

ranatahuas yuyarichichu. Shuc jucha ranaguna aichata mana huaglichinzhu ashiyanacuenta, randi runa ashiyasha amullata pahua quiquin aichataga huaglichin.¹⁹ Manachu yachanguichi Diosmi pahua sumac Samaita cangunama cura. Diospa Samai camba shungu ucui causashcaraicu camba aichaga pahua huasi man. Quiric asha ñucanchi aichaga mana ñucanchihuacchu.²⁰ Jesuspá rahuaihuan randishcaraicumi ñucanchi aichahuas ñucanchi shunguhuas Diospaglla anaun. Chasna Diospac asha ñucanchi aichahuas juchata mana ranachu, sirtu chihuan Diosta balichinami anchi.

Huarmita carita japinamanda

7 ¹Alimi. Cunanga canguna ñucata quillcashash tapushcagunata cutipashami. Maican runa huarmita mana japicpiga alimi. ²Randi runa ashiyanata yapa yuyarishcamanda caran runa pahua quiquin huarmita japisha causanami. Huarmiga chasnallata pahua quiquin carita japisha causanami. ³Shuc runa pahua quiquin huarmihuan llutarinami mana mitsasha. Chasnallata shuc huarmiga pahua quiquin carihuac llutarinami mana mitsasha. ⁴Huarmi aichaga mana huarmihuagllachu astahuansas pahua carihuac man. Chasnallata cari aichaga mana amuhuagllachu randi pahua huarmihuac man. ⁵Cangunapura ama mitsanacunguichichu. Canguna ishcandipura Diosllata yuyarisha mañananata munasha ansa punzhallata ama pariu puñunguichichu, chihuasha cuti llutaringuichi. Unaita mana llutaricpiga Satanas cangunata juchaibi urmachingami canguna ahuantanata mana ushashcamanda.

⁶ Alimi. Caita quillcashash runaguana ama shucta japichichu nisha ñuca

mana mandanichu. Canguna pariu japicpiga ali man. ⁷Chasna agllaia caita nini, tucuiguna ñucacuenta huarmi illac causacpi alichari anaunma. Randi Dios caran tunu causanata cushcami, maican runa japinatas, shucca mana japisha ahuantanatas.

⁸Chara sapalla causaccunamas huaccha huarmigunamas shuc shimita charini yachachingahua. Canguna ñucacuenta sapalla asha causasha ali anguichima. ⁹Randi sapalla puringahua mana ahuantanata ushashaga japinacuichilla. Pai jolina huarmita ashiyana randimanda alita japinacuna yali ali anma.

¹⁰Randi japinacushcagunata rimani, cariycu huarmiga pahua carita mana jichunachu. Chi shimiga mana ñuca mandashca shimichu randi Señor Jesucristomi chita mandara. ¹¹Randi pahua carita jichushaga ama shucta japichun, pai shucta japisha nishaga pahua quiquin carihuac alichisha cuti pahuan causachun. Shuc runaga chasnallata pahua huarmita ama jichuchun.

Quiricca mana quiricta charishcamanda

¹²Chi shuccunama caita rimani, Señor Jesus mana mandashcachu randi ñuca yuyaimanda caita nini. Shuc quiric runaga pahua huarmi mana quiric ashallata pahuan causasha nicpiga ali manga, pahua huarmita ama jichuchun. ¹³Chasnallata, quiric huarmiga pahua cari mana quiric ashaga pahuan causasha nicpi ali man, pahua carita ama jichuchun. ¹⁴Chi huarmiga ama yuyarichun cai mana quiric runahuan causasha Dioshuan mana ali tucuni nisha. Randi huarmi quiric ashcaraicu pahua

cariga pahuan causasha Dioshuan ali tucunata ushanga. Chasnallata quiric cari mana quiric huarmihuan causashcaraicu mana alichu tucuni nisha ama rimanguichu. Randi pai quiric ashcaraicu pahua huarmiga pahuan causasha Dioshuan ali tucunata ushanga. Chasnallata pahua huahuaguna Dioshuan ali tucunata ushanaunga. Mana chasna acpiga chi huahuagunaga mana quiricpa huahuagunacuinta tucunaungami.

¹⁵ Mana quiric cari ashas mana quiric huarmi ashas llushpirisha nicpiga llushpirichun. Chasna llushpiricpi saquishca runaga saquishca huarmiga mana huatashcacuinctachanga chi mana quirighuan angahua. Náucanchi piñanacusha causanata Dios mana munanzhu. ¹⁶ Huarmi pahua cari quishpichitucunmachari mana yachanzhu, cariga pahua huarmi quishpichitucunmachari mana yachanzhu. Chasna mana yachasha quiricca mana llushpirichun.

**Jesucristota quirisha
lugar runa anguichi**

¹⁷ Alimi. Tucui quiric muntungunama caita mandani. Maican runa Señor Jesusta quirishca punzha ima tunu runa ashcasha chi tunulla purichi, Yaya Dios paita rashcacuincta causachun. ¹⁸ Quirishca uras maican runa israel runa ashaga ama cambiasha nichun randi israel runa achun. Shucca mana-israel ashaga israel runacuincta pitishca tucunata ama yuyarichun. ¹⁹ Israel runa ashas mana-israel runa ashahuas ama chita yuyaringuichichu, mana imaschan. Dios mandashcagunata pactachisha yuyarinallami anguichi.

²⁰ Caran amu quiric tucusha ñaupa ashcacuincta causachun. ²¹ Quirishca

uras huatashcacuincta amuyuc runa acpihuas ama chimanda llaquirichu. Randi llushpirinata ushashaga llushpirilla. ²² Canguna lugar ashas, mana lugar ashahuas, caita yuyarichi, maican runa quirishcai huatashcacuincta amuyuc ashaga cushiyachun pahua juchamanda Jesucristo lugaryachishcaraicu. Mana amuyuc runaga quiric tucusha ña shuc huatashca runacuincta Jesucristohuacta rac runa tucunmi. ²³ Jesucristo yapa turmintariura cangunata lugaryachingahua. Canguna pahua balic rahuaihuammi randishca ashami mana shucpa runa tucunguichichu. ²⁴ Chasna acpi quiric huauquiguna, canguna quirishca uraspi imaibi ñaupa causac asha chicuincta causaichi, randi Diosta quirishcahanmi purichi.

Imasna Señor Jesusta yuyaringuichi

²⁵ Mana cariycu huarmi ranagunamanda cunan rimasha. Señor Jesus caita mana mandarachu randi pai ñucata yuyarisha yanapashcamandami canguna ñuca rimashcataga uyacpi ali man. ²⁶ Cunan ñucanchi yapa turmintariushcai causashcaraicu canguna mana japinacusha causacpi ali anma. ²⁷ Huarmiyuc ashaga camba huarmita ama jichunguichu. Mana huarmiyuc ashaga huarmita ama mascanguichu charingahua. ²⁸ Canguna japisaga mana juchata raunguichichu. Chasna agllaita japinacushcagunaga cai mundui yapa turmintarinata tupangaunami. Chi llaquigunata ama apachun nisha munani.

²⁹ Chasna agllaita caita cangunama rimani huauquiguna. Turmintarinata punzhaguna mana ashca punza pishinzhu, ña tucuriunmi. Chita yachasha cunanmanda ñaupagma

huarmiyuc runaga ama paihua
huarmillata yuyarichun astahuanbas
Diospagmanda yuyarisha causanami.
³⁰ Chasnallata llaquirisha huacac
runaga ama chi llaquirishcata
yuyarishalla causana anguichi.
Cushiyac runaga ama chi
cushiyashcata yuyarishalla causana
anguichi. Cai pachai randishca
charishcagunata ama yuyarishalla
purina anguichi. ³¹ Chasnallata cai
pachai ali causangahua ama chigunata
yuyarishalla tarabana anguichi. Tucui
cai pachai tiyaccunaga tucurinallami.
³² Chiraicu canguna cai causaimanda
mana yuyarishachu lugar causachun
nisha munani.

Chasna acpi mana huarmiyuc
runaga Señor Jesusta yuyarinmi,
paita cushiyachinata munanmi.
³³ Randi huarmiyuc runaga cai
causaimanda yuyarinmi paihua
huarmita cushiyachingahua. ³⁴ Paihua
huarmitahuas Diostahuas ishcandita
(2) cushiyachinata ñalla mana
ushashaga chicanda yuyarisha causan.
Chasnallata cariyuc huarmiga paihua
carita cushiyachinata yuyarisha
causan. Mana cariyuc huarmiga randi
Diosta yuyarinmi paihua aichahuan
paihua yuyaihuhanbas Diospacpi ali
causangahua.

³⁵ Tucui chigunata rimani cangunata
yanapangahua. Mana cangunata
turmintachingahua rimanichu randi
canguna tucui yuyaihuhan Señor
Jesusta cushiyachisha causachun nisha
munani.

³⁶ Maican runa pai tapushca
huarmihuan mana ali puriucri paita mas
rucuyaushcata ricusha japidacushun
ali anma nisha japidacuchun. Chiga
mana juchachu. ³⁷ Chasnallata maican
runa mana japidashaga, ña mana
japisha nishahuas, paihua aicha

munashcata mandanata ushashaga
pai yuyarishcasha mana japisha
chasnallata alita ran. ³⁸ Maican runa
japishaga alita ran, maicanga mana
japishahuas mas alita ran.

³⁹ Huarmiga paihua cari
huañunagama paihuau pariu
causanami. Paihua cari huañucpi
lugaryan, shucta japidata ushammi
chi runa Señor Jesusta quiric acpi.
⁴⁰ Randi ñuca ricucpi paita sapalla
ashaga mas cushi causangami. Chasna
ñuca yuyarishcata rimani, Diospa
Samaihuas ñuca ricucpi chasnallata
yuyarin.

Micunata yanga dioscunata ricuchisheamanda

8 ¹ Alimi. Cunan ña cuintangarauni
yanga dioscunata ricuchishca
aichamanda. Maican Jesucristota
catic runaguna ñaupa chi aichata
micuc asha ninaun ñucanchi tucuita
ali yachashcaraicu chita mana
sasinata minishtirinchichu, chasna
micusha Diospacpi mana huaglihca
tucunchichu nisha. Yachanaga amuta
alabarichisha shuccunatas mana
yanapanzhu, randi llaquinaga shuc
quiric runata yanapan mas sinzhi
quiric tucuchun nisha. ² Pihuas ñuca
yachanimi nisha yuyarishaga chara
pishin tucuita yachanata. ³ Chasna
agllaita Yaya Diosta shungumanda
yuyaric runata Dios alita ricsin.

⁴ Chasna acpi yanga dioscunata
ricuchishca micunata micusha nisha
caita yuyarina manchi: Yanga dioscuna
mana causaista charinata yachanchi,
chasnallata yachanchimi shuc causac
Dioslla man. ⁵ Chasna acpihuas cielo
cai allpaibihuas runa alabashca ashca
dioscuna tiyacpis yanga manaun. Sirtu
ashca tiyaungunami dios nishcaguna
runa balichishcagunahuas. ⁶ Chasna

paiguna ashca tiyaunguna nigllaita yachanchimi shuc Dioslla tiyanmi, paiga ñucanchi yayami. Paimi tucuigunata rara, ñucanchitahuas rara pai munashcata rachun nisha. Chasnallata shuc mandagllami tiyan, paiga Señor Jesucristomi. Paimi tucuigunata rashca aunguna, ñucanchihuas paihua ushaihuan causanchi.

⁷Chasna acpi yanga dioscunama ricuchishca aichaga micunallami, randi mana tucui quiriccuna chita yachanaunzhu. Paiguna yanga dioscunata ñupa caticcuna asha cunan yanga dioscunama ricuchishca aichata micushaga paihua yuyaibi turbarisha rimaunguna chita micushcamanda ñuca causaita ña huaglichishcanimi nisha, culpayuc tucushcani. ⁸Yuyarichi. Chi micunata micucpiga Dioschu ñucanchita rimanga canguna mas ali anguichi nisha? Mana. Ñaucanchi micushaga chi micunahuan mana mas ali tucunchichu, mana micushahuas mana pishitucunchichu.

⁹Can micunata munashaga micuilla, lugarmi angui. Randi shucta ama pandachingahua yuyarichi. Shuc mana sinzhi quiric runaga can micuushcata ricushaga paihua shungu ucui culpayashcacuinta tucun. ¹⁰Ricuchi. Can sirtu Diosta quiric ashaga shuc yanga diospa huasima risha micuushcata shuc quiric huauqui chibi canda tupanma. Paihuas, paihua yuyai turbarigllaita cancuinta rasha yanga diosta ricuchishcata micunma. ¹¹Chasna tucucpi can ali yachani nishallata chi mana sinzhi quiric huauquita Cristo huañusha quishpichishca acta huaglichishcangui. ¹²Camba mana sinzhi quiric huauquita chasna huaglichisha Cristohuacpis mana alita rasha juchata rangui.

¹³Chiraicu ñuca micushcaraicumanda shuc quiric huauquita mana alita rachishaga ima uraspas aichata mana micushachu nini ñuca paita mana pandachisha juchai urmachingahua.

Jesucristo cachashca runa mani

9 ¹Ñaucaga Jesucristo japisha camachigrichun nishca cachashca runa asha chi shuc camachic runagunacuinta ranatas lugarta charini. Ñaucahuas ricushcani ñucanchi Señor Jesusta. Cangunaga ñuca camachishcata uyasha quiric tucusha Señor Jesuspecta ñuca rauctaga ricuchic anguichi. ²Shuccuna ñucamanda rimasha paiga mana Jesucristo cachashca runachan nisha, rimallata cangunaga ñuca yachachishcamanda quiric tucusha tucui runagunama ricuchinguichimi ñuca sirtu Cristo cachashca runa ashcataga.

³Tucui ñucamanda pai mana Cristo cachashca runachan nisha rimac runagunata caita rimani, ⁴⁻⁶Tucui Diospa shimita camachingahua cachashca runagna puriusha paigunama cushca cullquihuan causaunguna. Ñáuca Bernabendi randi ñucanchi maquihuan tarabasha causaunchi. Ñaucanchilla tarabanachanchi. Ñaucanchi Diospa shimita camachingahua pasiacpi yachachishca runagna manachu carana anaun. Pedrohuas Señor Jesuspa huauquigunahuas chi shuc cachashca runagunahuas maitas risha caran shuc paihua quiquin quiric huarmindi purinaipi yachachishcata uyac runagna paigunata cuiranaun. Ñaucanchi manachu chasnallata tucunata ushanchi.

Uyaccuna camachicta yanapana anguichi

⁷Sundaluga paihua quiquin cullquihuan causanzhu. Lumuta tarpuc huarmis manachu lumuta

micun, huagrata cuirac runa manachu lechete upin. Chicuinta Diospa shimita yachachic runaga chi tarabanamanda cushca cullquihuan micunami.⁸ Ñáuca mana runa yuyaimandachu rimani, Dios Moisesta quillcachishca shimibi chicuintami nin casna nisha, tarabac runaguna tarabashcamanda causanami.⁹ Pai mandashca shimibi casna quillcashcami:

Shuc huagra chi muyu carata
lluceshichingahua jaitaushcái
paihua shimita ama huataichichu
nin.
Randi pai ashilla muyuta
micunata munashaga micuchun
nin.

Chasna quillcashca an. Chita rimasha Yaya Dios huagrallata yuyarishcachu. Mana.¹⁰ Manachu ñucanchimandahuas yuyarira. Indá, ñucanchi yachangahua chita quillcachira. Tarpuc runas, pallashcata lluchuc runahuas tarabashcamanda maican muyutas micunata ushanaunmi jaitac huagracuinta.¹¹ Chi tarpuc runa tarpushcata micushcacuinta Diospa shimita ñucanchi cangunata yachachishcaraicumi canguna ñucanchima charishcata cunami anguichi.¹² Shuc camachic runaguna canguna cushcahuán micusha causanaupi ñucanchiga manachu maspas lugarta charinchi chasna causanata canguna ñucanchi camachishcata quiric tucushcamanda.

Ñaucanchita randi mana yanapashcanguichichu

Ñaucanchi randi mana imatahuas japihcanchichu canguna maquimanda. Pishi ashallata tucuita ahuantanchimi canguna Jesucristota alita quirinauchun nisha.¹³ Manachu yachanguichi Diosta alabana huasibi

tarabaccuna sirbischcamanda Diosma ricuchishca micunata micusha causaunguna, chasnallata Diosma ricuchishca aichatas huanchisha chimanda micuunguna.¹⁴ Chicuinta ranata Señor Jesucristo ñucanchita mandara casna nisha, Dios quishpichishcamanda camachiccuna paihuacta tarabashcaraicu uyaucunaga paigunama alita cumbiranauchun.¹⁵ Ñaucaga canguna yachachishcamanda cumbirahuai chi nisha rimanata ushashcani randi mana rashcanichu, chi randimanda ñuca quiquin cullquihuanmi randisha causashcani. Cunanas mana quillcanichu canguna ñucama cumbiranauchun nisha. Cangunata yachachishalla cushiyani. Chasna yachachinata saquina randimanda micuna illac huañushaga alimaima nini.

Tucui tunucuinta tucuni quirinauchun nisha

¹⁶ Diospa quishpina shimita yachachishcamanda mas ali mani nisha mana yuyarinichu. Dios ñucata japihuashcami chasna rangahuaca, chasna acpi imatata rashata. Mana yachachicpiga ñuca shungu yapa turmintarihuanga ñuca ranata mana pactachishcamanda.¹⁷ Cullquita mana japihallata shungumanda yachachisha shuc cumbiranacuinta cushita japingarauni. Randi Dios ñucata japihsa camachigri nisha mandashcaraicumi rana ani.¹⁸ Ñáuca yachachishcamanda canguna cullquita japiñata ushashallata ñuca quiquin cullquillahuánmi causauni. Chasna rashallata cumbiranata japihcacuinta cushiyani Jesucristomanda camachisha nisha, uyaccuna pagahuai nisha mana yuyarinichu.¹⁹ Ñáuca lugar runa

ashallata huatashcacuinta llambu runagunata yanapac tucushcani ashcaguna Jesucristota quiric tucunauchun nisha.²⁰ Israel runaguna Señor Jesucristota quirinauchun nisha ñuca paigunahuan tiyasha paigunacuinta tucuni. Paiguna Moises mandashca shimigunata pactachinami ashcamanda ñuca chi mana shimita pactachinata minishtishallata chigunata pactachic ani paiguna Jesusta uyanauchun nisha.²¹ Chasnallata mana-israel runaguna quiric tucunauchun nisha paiguna Moises mandashcagunata mana chariccuna ashcamanda ñucahuas mana pactachiccuinta tucuni paiguna Señor Jesusta quirinauchun nisha. Chasna ashahuas ñuca Cristo mandashcataga pactachic ashcamandami Yaya Dios mandashcata mana saquinichu.²² Chi mana sinzhi quiriccuna mas sinzhi quiringahua ñuca paigunacuinta tucuni. Maibi tiyasha chi muntunbi tiyaccuinta tucuni maican paigunamanda quiric tucunauchun nisha.²³ Náuca tucui imata rashahuas Jesusmanda quishpina shimi mirarichun nisha rauni Dios cungaraushcata japingahua.

**Yaya Dios cungaraushcata
japinata yuyarisha causaichi**

²⁴ Yachanguichi ashca runaguna callpasha binsisha nishallata shuglla randi binsin. Paillami cumbiranata jalin. Chicuinta Dios cungaraushca cumbiranata japingahuaca ahuantasha causaichi.²⁵ Tucui callpac runaguna paiguna aichagunata sinzhita mandasha alita cuiraunguna. Binsic runa cumbiranata japiqlaita mana unaihuasha chi cumbirana panga curuna chaquirisha tucurin. Náucanchiga Dios cumbiranata japisha

nisha ñucanchi yuyarinatas aichatas mandanchi chi callpac runagunacuinta. Randi Diospa cumbiranaga mana ima uraspas tucuringachu.²⁶ Yanga callpac runa mana imatas japingachu. Chasnallata shuc macac runa yanga huarallai macashaga mana imatas japingachu. Náucaga Jesucristohuan purisha mana paigunacuinctachu purini.²⁷ Astahanbas chi macaccuinta ñuca aichatami sinzhita mandani tucui uras alita rangahua. Chita mana rashaga shuccunata yachachillaita Dios paihua cumbiranata mana cuhuangachu.

**Israel runaguna
tucushcamanda yachashun**

10 ¹Yuyarichi huauquiguna. Náupa uras Yaya Dios tucui ñucanchi huañuc apayayagunata imaibis yanapara. Paiguna purina ñambita ricuchisha pailua puyuhuan ricuchira. Tucui ñucanchi unai ñupa huañuc apayayagunami chi puyuta catisha purishcauna. Chasnallata tucui paigunami Puca Lamarta chimbasha Yaya Dios yacuta chaupichishcaibi chaquihuan chimbashcauna.² Paiguna Moisesta catisha riushcai yacutas puyu ucutas pasasha bautisarishcacuinta tucushcauna. Chasna rasha Moises rimashcata uyac ashcauna.³ Chasnallata llambulla Yaya Dios cachashca micunata micushcauna.⁴ Pai cushca yacutas tucuigunami upishcauna. Shuc rumimanda Dios yacuta llucshichishcata llambulla upishcauna. Cristoga chi rumicuinta asha paigunahuan tucui uras puriushca.⁵ Chasna Yaya Dios paigunata yapa yanapagllaita pai munashcata mana tucui ranaurachu. Chiraicu paigunahua allpama chara mana pactasha mana cailla huañushcauna chi chasquishca partibi.

⁶Chasna tucushcamanda yachana anchi mana paigunacuinta rangahua. Ñaucanchiga paigunacuinta yapa mana aligunata mana munanachanchi. ⁷Chasna yachasha paiguna rashcacuinta yanga dioscunahuacpi ama cungurisha alabachichu. Paiguna chi runa rashca diosta balichisha Diospa shimibi quillcashcacuinta tucuscauna, chi diosta alabasha chiguna micusha machasha bailanaura nishca. ⁸Maicanguna huarmigunata japisha juchata ranaura. Chimanda Dios libachisha ishcai chunga quimsa huaranga (23.000) runagunata shuc punzhalbalaibi huanchishca. Paiguna mana ali yuyarisha rashcacuinta ama ranguichichu. ⁹Chasnallata ama yuyarishunchi ñucanchi juchata racpiga Yaya Dios llaquic asha ñucata mana libachihuangachu nisha. Paiguna chasna Diosta piñachishcamanda paluta cachashcai paigunata huañuchingahua. ¹⁰Maicangunaga Dios shayachishca mandac amugunata piñasha mana balinaunzhu nishcauna. Paiguna chasna rimashcamanda Yaya Dios paihua huanchic angelta cachara ashcagunata huanchingahua.

¹¹Yaya Dios paigunata libachira paiguna yuyarisha ali purinauchun nisha, chihuasha ñucanchiraicu chimanda quillcachira ñucanchi tucuriuna punzhaguna causac asha chita yuyarisha ali causangahua. ¹²Chasnata yachasha maicanbas ñuca sinzhi quiric asha mana urmashachu nisha rimac runaga ali yuyarisha causachun mana juchaibi urmangahua.

Yaya Dios canda yanapanmi supaita binsinata

¹³Yuyarichi. Supai cangunata urmachinata munasha camagllaita paita binsinata ushanguichimi.

Cangunata turmintachishcacuinta shuc quiriccunatas chasnallata pai quillachin. Yaya Diosca randi cangunata llaquishami supai quillachiushcaibi cangunata mana cungaringachu, canguna ahuantana tupullata saquingami mana yalicta. Supai quillachiushcaibi Yaya Dios canda ricuchingami imasna can supaita binsinata. Pai chasna canda ricuchicpi supai quillachishcata quishpinata ushanguimi mana juchata rasha. Chasnahan ahuantanguichimi.

Ama Jesucristota piñachishchunchihu

¹⁴Chasna acpi mana ashillahuas yanga diosta yuyarisha balichichu llaquishca huauquiguna. ¹⁵Ñáuca rimashca shimi sirtu ashcata yachangahua yuyarichi. Canguna yapa yuyaiyuc ashcaraicu casna rimani.

¹⁶Jesucristo huañushcata yuyarisha upisha pagrachu ninchi pai rahuaite ricuchishca upinamanda. Pariu upisha Cristohuan shugllashina tucunchi. Chasnallata pan paquicta pariu micusha chihuan Cristo huañushca aichamanda shugllashina tucunchi.

¹⁷Chi pan shuglla ashallata piticipi manzhu ashca tucun. Ñaucanchi chicuelltalla ashcaguna ashallata chi panda pariu micusha pariu yuyarisha shuc aichacuelltalla tucunchi.

¹⁸Israel runagunata yuyarichi. Diosma ricuchishca aichata pariu micuc runagunaga manachu Dioshuan shuglla anaun. ¹⁹⁻²⁰Chasnallata mana quiriccuna yanga diosma aichata ricuchisha mana sirtu causac Diosmachu cun astahuanbas supaima cun. Yanga dioscunaga ushaita charinaunzhu. Mana. Chi dioscuna yanga maunguna, mana causacchaunguna. Randi chi aichaga

yanga diosma cushca aicha ashallata ali man. Casna yuyarichi. Mana quiric runa yanga diosma ricuchishca aichata canguna pariu micushaga chi supaimanda yuyarishcata ricuchinguichi. Canguna ima supaiguñahuan shuglla tucunatas mana munanichu.²¹ Náa yuyarichi. Cristohua rahuaita ricuchina yacutas chasnallata supaima ricuchishcetas ishcandita (2) mana upinata ushanchichu. Cristohua aichata ricuchina panda supaima ricuchishcetas ishcandita mana micunata ushanchichu. Mana chasna ranataga yuyarinachan.²² Ishcandita yuyaricpi Señor Jesucristo piñangami ñucanchi paillahanmi purina ashcamanda. Pai ñucanchimanda yali ushac acpi ama casna rasha piñachishunchi.

Shucta alita yuyarisha ranallami

²³ Maican Jesucristota caticcunaga lugarta charinchi imatas ranatas ninaun. Chasna agllaita mana tucui ranaga quiricta yanapanzhu. Maicanga chita ama ranguichichu ninaun, shuccunaga chita rasha alimi ninaun. Chasna rimagllaita chigunata rashahuas camba shunguta mana alichinata ushanguichichu.²⁴ Chi randimanda shuccunata yanapanata yuyarinami anchi. Pihuas amu ali tucunallata mana yuyarinachu, astahuanbas shuccuna ali tucunata yuyarisha causashun.

²⁵⁻²⁶ Diospa shimbí casna quillcashcami: Tucui munduga Yaya Diospagmi. Chasna acpi tucui micunalla an. Chita yachasha aichata randisha mana tapusha randisha micuichi. Yanga diosma ricuchishca mana alichan nisha mana yuyarisha micuichilla.²⁷ Shuc mana quiric

runa canda rimasha ñuca huasima micucshamui nicpi can munasha pailhuagma rilla micungahua. Risha pactacpi imatas canda caracpi micuilla, caiga huaglichihuangachu imata nisha mana yuyarinachu.²⁸ Astahuanbas shuc runaga canda cai aichaga yanga diosma ricuchishca aichami nicpi ama micuichu. Can micuepiga chi rimac runa turbarishca tucungami.²⁹ Can chita micunata ushshallata pai chi micunata sasischcaraicu ama micuichu. Can micushcata ricusha pai turbarishca tucungami. Chasna tucupi pai ricushcaibi ama micuichu.

Chasna acpi maican canguna rimahuanguichichari pai chita micunata mana munagllaita ñucahuas manachu ushani micunata nisha tapunguichima.³⁰ Náuca Yaya Diosta pagrachu nisha micupiga imahuacta ñucata caudsayachishca tucuni.

³¹ Chasna acpi canda nini imata micushas upishas imata rashahuas tucuita raichi tucui runaguna Yaya Diosta alita balichingahua.³² Chiraicu ñucanchi rashcahuan shuccuna pandarisha juchaibi urmangahua mana ranachanchi. Tucui runagunata israelgunatas, mana-israel runagunatas, Diosta quiric muntundas mana pandachisha tucuita alita rasha yanapanami anchi.³³ Náucaga imata rashahuas runagunata yanapangahua alita yuyariuni. Tucui runaguna quishpisheca tucuchun nisha ñuca quiquin munaita mana yuyarishachu randi shuccunata yanapasha nini.

11 ¹Cristo purishcacuinta ñucas puriuni, cangunas chasnallata ñuca purishcacuinta purichi.

Pariulla tendarisha ranaguna

²Canguna ñucata yuyarishami, ñuca yachachishcata mana cungarishachu

pactachisha alita causanguichi. Chimandami alimi nisha cushiyani llaquishcagua. ³Shuc shimita mas charini cangunata yuyarichingahua. Yaya Diosca Cristota mandashcacuinta Jesucristo paita quiric runagunatas mandanmi. Chasnallata shuc cariga paihua quiquin huarmita mandanmi.

⁴Ñáa cariguna Yaya Diosta mañaushcrai, Dios yuyachishcata rimaushcrai, umata taparishaga pingarishca tucun. ⁵Huarmigunaga randi Yaya Diosta mañaushcrai, Dios yuyachishcata rimaushcrai, umata mana taparishaga pingarishca tucun. Pai chasna mana tapashaga paita mandac cari illaccuinta ricuringa, accha illaccuinta pingarishca tucungami. ⁶Shuc huarmi paihua umata mana taparinata munashaga paihua acchata illacta pitirichun. Randi ama pingaringahua paihua acchata mana pitirinata munashaga paihua umata pacarichun.

⁷Runagunaga Diosta ricuchinmi. Dios punda runata rasha pai munashcacuintata rashcami runa rimangahua Dios ñucata mandac man nisha. Chimandahuasha huarmiga ñuca cari ñucata mandahuan nisha rimana man. Chasna acpi runa Dios ali acta ricuchic asha caran cuti paita mañaushcais camachiushcais paihua umata mana taparinzu. ⁸Yuyarichi. Dios punda carita rasha mana huarmi cushtillamanda rashcachu astahuuanbas cari cushillamandi huarmita rashca. ⁹Carita mana rashcachu huarmita yanapangahuaca randi huarmita paihua carita yanapachun nishami rashca. ¹⁰Chimandami huarmi paihua cari mandashcata uyac ashami umata taparinami angelgunahuas ricungahua.

¹¹Chasna agllaita Diospacipi caris huarmis pariu yanapanacun.

Tucui cariguna illacpi huarmiguna causanata ushanaunzhu. Mana. Tucui huarmigunas illacpi cariguna causanata ushanaunzhu. Mana, mana ushanaunzhu ansas. ¹²Dios chi punda huarmita raushcrai cari aichamandami rashca. Cunanga cari pagarisha huarmi aichamandami llucshin. Dios chasna ishcandida (2) rashcami.

¹³Cangunallata yuyarichi. Huarmigunaga Diosta mañaushcrai paiguna umata mana taparicpiga alichanga. Mana. ¹⁴Ñaucanchi yuyaibi cari suni acchata charicpiga pinganayacta tucun. Canguna manachu chasnallata yuyaringuichi. ¹⁵Chi huarmiguna Dios cushca suni acchata charinaun umata tapasha cushita charingahua. ¹⁶Chasna agllaita maicanbas chi yachachishcata mana uyanata munashaga yachachun, ñucanchihuas tucui quiric muntungunahuas chicuinta pariu yuyarinchimi.

Canguna tendarishcrai imasna micusha upinguichi

¹⁷Ñáa shuc yuyaita cangunata yachachinata munani. Canguna rashcagunata yachasha alita ranguichi nisha rimanata mana ushanichu. Cangunapura yanapanacuna randimanda huaglichinacunguichi. ¹⁸Canguna quiricpura pariu tendarishallata chican chicanda yuyaringuichi. Chasna shuc shimi cangunamanda pactamuhuashca. Chi shimita nictaga ña chita ashillata quirini. ¹⁹Ali quiric ashcata ricuchingahuaca cangunapura chicanyarishami ali anma. ²⁰Canguna tandariusha Señor Jesus huañushcata yuyarinata micungahua tendarinchu nishallata mana chita yuyaringahua shamunguichichu. ²¹Randi paitaga

mana yuyarisha amullata micusha nisha yuyaringuichi. Caran amu paihua quiquin apamushcata uctalla micushun nisha micunguichi upinguichi shuccunata mana chapasha. Chasna tucucpi maicanguna ashillata apamusha raicasa tiyaunmi, shuccunaga ashca apamusha machashca tiyanaun. Chasna uyashcani.²² Manachu micuna upinas canguna quiquin huasibi tiyan. Chasna tiyacpi imaraicuta chi ashillata apamuc pugri runata pingachinguichi. Can chasna rashaga Diospa runagunata mana balichinguichichu. Imasata ningoichi, ñuca canguna chasna rashcamanda alitachu rimasha. Sirtupacha cangunamanda alita rimangahua mana ushanichu.

Jesucristota yuyarisha micuna

(Mt 26.26-28, Mc 14.22-24, Lc 22.19-20)

²³ Señor Jesucristo ñucata yachachihuara pai huañushcata yuyarisha micunamanda. Chasna pai yachachishcacuinta cangunama randi yachachishcani casna, Señor Jesusca paita huanchiccunama japitucuna tutami panda japisha Diosta pagrachu nira.²⁴ Pagrachu nishcahuasha chi panda pitisha rimara, micuchi, caiga ñuca aichacuinta man, cangunamanda huañuna. Caita micushami ñucata yuyarichi nira.²⁵ Chasnallata micui pasashcahuasha pillchita japisha rimara, cai vinoga ñuca raihuai man, Dioshuan alichina mushuc shimita ricuchinmi. Ñáuca talishca rahuai chi mushuc shimi sirtu pactaringaraushcata ricuchinmi. Ima uras caita upishahuas ñucata yuyarichi nira.²⁶ Chasnamandami Señor Jesucristo shamunagama caran cutin canguna cai micunata

micusha cai upinata upisha pai ñucanchimanda huañushcata rimanacunguichi.

Ali yuyaihuan Jesusta yuyarina micunata

²⁷ Maican runa mana ali shunguhuan cai panda micusha cai upinata upishaga Cristohua aichata rahuitas mana balichishami juchata ran.²⁸ Chiraicu caran amu yuyarina an. Chara cai pandas cai upinatas mana japiushallata canguna shungu ucui aucunata yuyarina an. Jucha rana mana tiyacta yachasha japichilla.

²⁹ Maicanbas yangamanda japisha Jesucristo huañushca aichata mana yuyarishaga yapa caudsayachishca tucungami.³⁰ Maicanguna mana ali shunguhuan japishcaraicu sambayashcacuinta puringuichi, maicanguna ungushcanguichi, maicanguna huañushcaunami.

³¹ Randi ñucanchi shungu ucuta ñucanchillata sumacta yuyarisha pandashcata alichishaga mana caudsayachishca tucunchima.

³² Astahanbas ñucanchi shungu ucuibi jucha yuyarishcata mana alichicpiga Señor Jesus ricusha yachasha ñucanchita libachinmi ñucanchi huasha chi mana quiriccunahuan taripaitucungahuan.

³³ Chasna yachasha huaquiguna Señor Jesucristo huañushcata yuyarisha micungahuami tandariushcai chapanacuichi tucui pariu micungahua.³⁴ Maicanbas raicasca ashaga paitua quiquin huasibi ñaupata micuchun nini canguna mana pandasha libachishca tucungahua. Alimi. Ñáuca cangunahuagma shamusha chi shuc canguna quillcasca alichinagunatas alichishami.

**Diospa Samai pahua
runagunama cumbiranamanda**

12 ¹Cunanga Diospa Samai pahua runagunama cumbiranagunamanda cuintasha. Yachaichi huauquiguna, Diospa Samaiga caigunata cunmi quiriccuna alita rangahua.

²Canguna yachanguichi ñaupa mana quirishca uraspi shuc runagunacuinta yanga dioscunata balichishcanguichi. Chi yanga dioscunaga mana causac asha mana rimanatas ushanaunzhu. ³Chasna mandami runaguna yachanata ushanaunmi maican runa Diospa Samai ushaihuan rimac acta. Diospa Samai yuyaihuan rimac runaga ima uras Jesus mana balinzhu nisha rimanata mana ushangachu. Randi Jesusca tucuimanda yali mandac amu man nisha Diospa Samaillahuanmi rimanata ushan.

⁴Dios ranagunaga manachu ashca tunu aunguna. Indá. Diospa Samaillami chi tucui tunu ranagunata cushcami. ⁵Quiriccuna Diospacta rashami ashca tunu ranaguna agllaita shuc amulla maun tucui chi ranagunahuan sirbingahua. ⁶Yaya Diosca pahua runagunata chicanda tarabachin. Paillami runaguna shungu ucui tarabasha paiguna alita pahuacta tarabangahua yuyachin. ⁷Caran shucpi Yaya Dios pahua Samaita ñucanchi charicta ricuchiun cushcagunata ranami anchi tucui quiricpura yanapanacuchun nisha.

⁸Diospa Samaimi casna rachin. Maican runagunama Diospagmunda rimana yuyaита cun, maicangunama alita yachana yuyaита cun. Ishcandima (2) cushca aunguna Diospa Samai ushaihuanmi rangahua. ⁹Chasnallata shuccunama yuyaита cun Diosta

sinzhita quiringahua. Maicangunama ushrita cun unguishca runagunata aliyachingahua. ¹⁰Maicangunama yuyaита cun pihuas mana rashcagunata rangahua, shuccunama Dios rimashcata alita pasachingahua. Shuccunama yuyaыта cun yachangahua Dios rashcachu supai rashcachu nisha. Maicangunama amu mana yachashca shimita rimangahua yuyaыта cun. Shuccunama yuyaыта cun chi shimita uyasha llambugunama pasachingahua. ¹¹Chasna ashca tunu ranaguna agllaita shuc Samaillami tucui quiriccuna shungu ucuibí pai munashcallata caran shuc runa ranauchun nisha paiga cun.

Llambu quiriccuna Cristo aichacuinta anchi

¹²Runa aichaga ashca cuyurinagunata charishallata shuc aichalla maunchi. Maquihuas chaquihuas ñahuihuas shunguhuas ashca chican agllaita shuc aichalla tucunchi. Chicuinta ñucanchiga Cristo aichacuinta asha, ashca ashallata shuc aichacuintalla anchi. ¹³Ñaucanchi bautisarishcai Diospa Samai ñucanchita Cristo aichacuinta shugllata rashcami. Maican israel runa ashas, maican mana-israel runa ashahuas, maican amuyuc ashas maican lugar runa ashahuas, llambu ñucanchi shuc aichacuintalla anchi. Yaya Dios tucui ñucanchima pahua Samaita cushca ñucanchi shungu ucuibi achun nisha.

¹⁴Aicha cuyurinaga mana shugllachu astahanbas ashca tiyan. ¹⁵Chasna acpi ñuca chaquiga mana maqui ashallata chara ñuca aichaibi tiyan. ¹⁶Chasnallata ñuca rinri mana ñahui muyu ashallata ñuca aichaibi tiyan. ¹⁷Ná intiru aicha shuc jatun ñahuilla asha rinri illacpiga imasnata

uyanchima. Ñáuca aicha shuc jatun rinrilla asha singa illacpiga imasnata muctinchima.¹⁸ Dios chiraicu tucui aichaibi caran tunu cuyurinata churashca pai munashcacuinta.¹⁹ Runa aichaga ñahui muyulla acpis, rinrilla acpis, maquilla acpis, mana balic aicha saquirinma.²⁰ Astahuanbas ashca cuyurina pariu tiyasha shuc ali aichalla tucun. Chicuinta ñucanchi quiriccuna chican tunu ranagunata rashallata Dios munashcatami tucuita pariu ranchi.

²¹ Ñáuca ñahui ali agllaita rinritahuas munani. Ñáuca uma ali agllaita chaquitahuas munani. Chasnallata shuc quiric runaga paihua quiric huauquita mana rimanachu canda mana munanichu nisha.²² Randi chi mana sinzhi cuyurinagua illacpiga ali causanata mana ushanchimachu.²³ Chasnallata chi mana balichishca partigunata sumacta churachinchi, pingaigunata mas alita catarinchi.²⁴ Ricurina partigunata randi mana imatahuas churachinchi. Dios ñucanchi aichata rasha alita rashcamí chi mana balichishcagunatas balichishca tucungahua.²⁵ Chiraicu chi cuyurinagua mana paillata yuyarinaun randi tucui aicha pariu cuirarisha yanapanacusha causaunguna.²⁶ Shuc nanaricpi manachu intiru aicha nanarin. Chasnallata shuglla ali acpi manachu intiru cushi tucun.

²⁷ Cangunaga chicuinta Cristo aicha manguichi. Caran shuc pahua ranata charinguichimi aicha cuyurinacuinta.²⁸ Aichaibi ashca cuyurinagua tiyashcacuinta Jesucristota quiriccuna Yaya Dios ashca tunu ranagunata caran shugma cushcamí. Casnami aunguna. Pundami anaura Jesus japhisa

cachashca runaguna, chihuashami pahua shimita camachiucuna, chihuasha yachachiucuna, chihuasha pihuas mana rashcagunata raucuna, ungushcagunata alichiucuna, shuccunata yanapaucuna, mandaucuna, mana yachashca shimita rimaucunatas churashcamí. Ricui, chiguna Diosca cushcagunami.

²⁹ Chiguna mana llambulla Jesus japhisa cachashca runa chaunguna, mana llambulla Diospa shimita camachiccuna chaunguna, mana llambulla yachachiccuna chaunguna, mana llambulla pihuas mana raushcagunata raucchaunguna.

³⁰ Chasnallata mana llambulla ungushcagunata aliyachinata ushaungunachu, chasnallata shuc mana yachashca shimita mana llambulla rimanata ushaungunachu, chi shimita pasachinata mana llambulla ushaungunachu. Mana llambu pariu raungunachu randi caran shucca Dios cushca ranata raungunami.³¹ Chasna acpi Yaya Dios ushaita cangunama cucpi tucui chigunamanda mas balic ranagunata yapa munaichi. Chasna agllaita cangunata mas ali shimita yachachishami.

Llaquinamanda

13 ¹ Ñáuca ashca shigmunate rimanata ushshallata, angelguna shimitahuas rimashallata astahuanbas shuccunata mana llaquic runa ashaga mana balicchani, shuc tán tán uyari mangata huactashcacuinta mani, yangalla rimani.² Diospa shimita ñuca yapa alita camachiushahuas, shuccunama mana yachachishca yuyaigunatas tucuitas ñuca yachashallata, chasnallata urcugunata anchuchingahua tucui shunguhuan

Diosta quiric ashallata astahuan shuccunata mana llaquic runa ashaga mana balicchani, yanga mani.³ Pugri runagunama tucui ñuca charishcagunata cumbirashallata, Diosta balichingahua ñuca aichata rupachichun nisha cushallata astahuan ñuca mana llaquic runa ashaga yanga rashcani.

⁴ Shuc runa quillachiupis chi llaquiu runaga ahuantagmi an mana piñasha. Llaquiu runaga llambu runagunata yapa alita yanapan. Shucpa charishcatas mana munanzhu, chasnallata amullata alabarinata mana yuyarinzhu.⁵ Llaquic runaga jiridsa mana ranzhu, mana paihuagllata yuyarisha mitsanzhu, mana piñasha causanzhu. Shuc runa mana alita raupiga llaquiu runa mana yuyarisha causanzhu.⁶ Ima mana ali rashcagunatas mana gustasha llaquirinmi randi sirtu rimashcagunataga gustasha cushiyammi.⁷ Llaquic runami shuccuna imata racpihus tucuimanda ahuantagllami. Yaya Diostaga alipacha quirishami cushiyasha chapaunmi. Llaquiu runa chasnallata ima tucucpihus mana saquinzhu.

⁸ Llaquinaga ima uraspas mana tucuringachu. Dios rimashcata pasachishca shimita tucuringami. Náaupa mana yachaushca shimita rimanahuas tucuringami, chasnallata ima yachanahuas tucuringami.⁹ Cunanga ashilla yachashallata mana tucuita yachanchichu. Diospa shimita camachishallata Dios tucui yuyarishcagunata mana yachanchichu.¹⁰ Randi puchucai punzha ñucanchi sumac tucushca uraspi ñucanchi cunan yachashcagunaga yanga tucungami.

¹¹ Huiñashcacuinta man. Náaupa uras ñuca huahua asha huahuacuinta

rimarani, huahuacuinta yuyarirani. Randi cunanga rucuyasha huahuacuinta ranata saquishcanimi.¹² Cunanga cai mundui causasha ñahuihuan Diosta ricunata mana ushanchichu, shuc rucu espiyuibi ricurishcacuinta an. Huasha randi ñahuipura Yaya Diosta alita ricunacungaraunchi. Chasnallata cunanga ashillata yachanchi, huasha randi Yaya Dios ñucanchita yachashcacuinta paita alita yachangamirauchi.

¹³ Alimi. Chasna acpi quimsa (3) mana tucurina aunguna. Caigunami Diosta quirina, paita cushihuan chapanas, llaquinahuas. Chi quimsamanda, llaquinaga mas yali balic man.

Mana yachaushca shimita rimanamanda

14 ¹ Chasna acpi llaquiu runaguna aichi. Chasnallata Dios cushca ranagunata yapa munaichi. Tucui chimanda Diospa ushaihuan paitu shimita yachachinata mas munaichi.² Can Diospa Samai yuyaihuan mana yachashca shimita rimacpiga Diosllatami rimangui. Randi runaguna uyashallata mana pihuas chi shimita yachasha mana asirtanaungachu.³ Randi Diospa shimita yachachic runaga tucui runagunata yanapan. Maicanguna ali yuyaiyuc tucungahua, shuccunas mas sinzhi quiric tucungahua shuccunas imatas ahuantangahua yanapan.⁴ Chi yachachisha mana yachashca shimita rimac runaga amullata yanapan ali yuyaric sinzhi tucungahua. Diospa shimita yachachic runa randi llambu quiriccunatami yanapan huigunga sinzhi tucungahua.

⁵ Tucui canguna mana yachashca shimita rimaccuna tucucpi ali

anma nini. Chasna tucunamanda mas munani canguna Diospa shimita yachachingahua. Chi mana yakashca shimiti rimana randimanda Diospa shimita yachachinaga manachu mas ali an. Chi mana yakashca shimita rimacpi shucca uyaccunahua shimita pasachinami. Chihuan ña tucui quiriccuna huiñashcacuenta sinzhi quirisha causangaunami.

⁶Yuyarichi huauquiguna. Náuca cangunahuacpi pasiausha shuc tunu shimita rimashaga imasnata cangunata yanapaima. Chi Dios ñucata ricuchishcata yachachishcata rimasha, Diospa shimita camachisha, quiric causanamanda yachachisha, cangunata yanapani.

⁷Tucashcagunata yuyarichi. Ilu pucuna bigulinbas ñuca rimashcacuenta an. Ali tucacpi yachanalla an. Randi yanga mana ali tucacpi imata tucunatas mana yachaibacchu. ⁸Sundaluguna chasnallatami. Paiguna tendarisha guerama ringahua paigunata mandac runa curmitata tucan. Randi mana alita tucacpi imasnata yachanaunga guerama rinata alichingahua.

⁹Cangunahuacpi chasnallatami. Canguna shuc mana yakashca shimita rimacpi imasnata shuccuna can rimashcata yachanaunga. Chasna rasha manachu yanga huairaibi rimanguichi.

¹⁰Tucui munduibí ashca tunu shrimguna aunguna. Chi shrimgunata rimacpura ña tucui rimashcata yachaungunami. ¹¹Randi shuc tunu rimashcata mana yakashaga carumanda shamuc runacuenta tucuni, pai chasnallata carumanda shamuc runacuenta asha ñuca rimashcata mana yachangachu.

¹²Chita yuyarisha Diospa Samai ushaihuan ranata yapa munashaga

yanapanata mas munaichi llambu quiriccunata sinzhiyachingahua.

¹³Chasna acpi can mana yakashca shimita rimac runa ashaga Diosta tapuna mangui yuyaita cuhuai nisha chi can rimashcataga ñucanchi quiquin shrimima pasachingahua.

¹⁴Náuca shungumanda mana yakashca shimihsuan Diosta mañashallata ñuca yuyai chi rimashcata mana asirtanzhu. ¹⁵Chasna acpi imasata rasha. Casna rashami. Diospa Samai cushca shimita ñuca shunguhuan mañashami chasnallata quiquin yuyaihuan mañashami. Náuca cantausha shunguhuanbas chasnallata ñuca asirtana yuyaihuanbas cantashami. ¹⁶Canguna pariu yachaucunaga tandariushcaibi camba shungüi cushiyasha Diosta pagrachusha shuc shimita rimacpiga mana yachaukunaga can rimashcata mana yachasha canhuan pariu pagrachunatas mana ushanaungachu.

¹⁷Chasna asha Yaya Diosta pagrachu niushallata mana yanapanguichu shuc uyac runa mana intindisha mas sinzhi quiric tucunata.

¹⁸Náucaga mana yakashca shrimgunata rimanata ushani tucui cangunamandas yalita. Chimandami Diosta pagrachuni. ¹⁹Chasna ashallata ñuca ashca shimita rimashallata paiguna mana yachacpiga yanga rimaima. Chiraicumí quiriccuna tendarishcaibi paiguna quiquin shrimillai ishcái shrimillata rimanata munani paiguna alita yachanauchun nisha.

Rucu runacuenta yuyaihuan causaichi

²⁰Imata rangahuaca ama huahuagunacuenta yuyarisha causanachanguichi huauquiguna,

randi rucugunacuinta yuyarisha causana anguichi. Ñáa huahuaguna juchata mana yuyarishcacuinta sirtu paigunacuinta aichi. ²¹Diospa shimita casna quillcashcam:

Carumanda chican shimita rimaccunata
ñuca israel runagunahuagma
cachashami rimanauchun nisha.
Chasna rimagllaita ñuca shimita
mana uyahuanauungachu,
nishami Dios nishca.

²²Chasna yachanchi shuc mana yachashca shimita Dios rimachin chi mana quiric runaguna manzharisha yuyarichun nisha. Randi Diospa shimita yachachinaga quiriccuna pai munashcata yuyachinmi. ²³Chasna acpi tucui canguna tandariushcai tucui canguna shuc tunu, shuc tunu shimigunata mana rimanachu. Tucuiguna mana yachashca shimigunatas rimacpiga mana quiric runagunas mana yachashca quiriccunas cangunahuagma shamusha uyasha llambu shuc lucu rucucuinta tucusheunami nisha rimanaungami. ²⁴Astahanbas canguna Diospa shimita yachachiushcai maican paiguna shamusha uyasha tucui rashcagunata ricusha paihua jucha rashcata yuyaringami. ²⁵Paihua shungüi mana ali yuyarishcaguna pagllai ricurishcacuinta tucunga. Chasna tucusha pai cungurisha Diosta alabasha balichingami. Sirtumi Dios caibi cangunahuan tiyaun nisha rimangami.

Quiriccuna tendarishcaibi ranaguna

²⁶Alimi quiric huauquiguna, casna anami. Canguna tandariushcai caran amuga Dios cushca ranata rachun. Maicanga cantachinata, maicanga yachachinata, maicanga Dios

ricuchishcata rimanata, maicanga mana yachashca shimita rimanata, chihuasha chi shimita uyasha quiquin shimita pasachinatas. Chasna imata rashas tucuita rana anguichi tucui quiriccuna huiñashcacuinta Jesucristohuan sinzhiyachichun.

²⁷Maicanguna mana yachashca shimigunata rimashun nisha shuc shuc rimanauchun mana pariu. Randi ishcai (2) quimsalla (3) rimachun. Chasnallata maican runa paiguna rimashcagunata yachashca shimita pasachinauchun. ²⁸Canguna tendarishcaibi pasachic runa illacpiga chi mana yachashca shimita ama rimaichichu, astahanbas chi runa Diosllahuan rimachun mana llambu runa uyaushcaibi. ²⁹Chasnallata caran cuti ishcai quimsalla Diospa shimita yachachichun. Chibi tiyauc uyaccuna sirtuchu nisha yuyarinauchun. ³⁰Chasna Dios mushuc shimita cangunata yachachingahua shuc tiyauc runata yuyachicpi ñaupapunda rimauc runa saquichun chi mushuc rimashcata uyangahua. ³¹Chasna rasha tucui canguna Diospa shimita yachachiccuna shuc randi, shuc randi rimanata ushanguichi. Chasna racpi tucui quiriccuna yachashami sinzhiyangauna. ³²Diospa shimita yachachiccunaga quiquinba shimita mandanaunmi, mana yanga munaimanda rimanachan. ³³Chasna acpi Dios cangunata yuyarichicpiga alita uyaibagllata rimana manguichi. Yaya Dios alita mandac asha tucui quiric muntunbi pariu ali aichi.

³⁴Cangunahuas chasnallata casna raichi. Quiriccuna tendarishcaibi huarmiguna chunlla tiyanauchun. Ñáaupa urasmanda Diospa shimita chasna quillcashca man huarmiguna chunlla tiyasha

uyanauchun mana cuintarisha.³⁵ Pai imatahuas yachanata munashaga huasima rishcai paihua carita tapuchun yachangahua. Quiriccuna tendarishcaibi huarmiguna rimanaga mana balinzhu.

³⁶ Caita yuyarichi. Diospa shimiga mana cangunahuanzhu callarira, Yaya Dios yuyachishca punda japistha runagunahuacpi callarirami. Chigunaga cangunamanda ñaupa quiriccuna tucuschca acpi ama yuyaringuichichu paihua shimi ñucanchillami uyaranchi nisha.

³⁷ Chita yuyarisha Diospa shimita yachachic mani nisha rimac runaga, Diospa Samai ushaita charinimi nisha rimac runahuas Señor Jesus mandanatami ñuca ña cangunata quillcashcataga yachaichi.³⁸ Maican chita mana chasna yuyaricpi paita ama uyaichi.

³⁹ Diospa ushaihuan paihua shimita yachachinata munaichi huauquiguna. Chasna munashallata shucca mana yachashca shimita rimangahua callaricpi ama jarcachishunchichu.

⁴⁰ Astahuanbas canguna imatas raushahuas alita yuyarishami rana anguichi.

Jesucristo causarishcamanda

15 ¹Cunanga Jesucristo quishpichina shimita ñuca ñaupa cangunata camachishcata cuti yuyachinata munani huauquiguna. Chi shimita quirishcamanda ali sinzhi tucuschcanguichi.² Ñáuca yachachishca shimita canguna quirisha mana saquishaga sirtu quishpichishca anguichi. Mana chasna ashaga yanga shimmillahuan quirishcanguichima.

³ Ñáucata yachachishcagunata cangunata camachirani. Chi balic shimiga Diospa shimibi

quillcashcacuinta casna man, Cristo ñucanchi jucha rashcagunata pichangahua huañushcami.⁴ Pai huañucpi pambanaurami. Quimsa (3) punzaibi Dios paita causachira paihua shimibi quillcashcacuinta. Chasna tucungaraushcata Diospa shimibi ñaupa quillcashca tiyara.⁵ Pai causarisha punda ricurira Pedrohuacpi, chihuasha tucui pai japistha runagunahuacpi ricurira.⁶ Chihuasha pichca patsac (500) yali pariu tendarishca quiriccunahuacpis ricurimura. Chigunamanda maican paiguna ña huañunaushca, randi ashcagunami chara causanaun.⁷ Chihuasha Santiagohuacpis ricurimura, chihuashaga llambu pai chunga ishcai (12) japistha cachashca runagna tendarishcaibi shamusha pagllai ricurimusha.

⁸Tucui chigunahuacpi ricurishcahuasha ñucahuacpis cungaimanda ricurihuara shuc shullarishca huahua cungaimanda pagarishcacuinta.⁹ Chi uras Diospa runagunatas yapa turmintachishcamanda mana baliccharani. Chasna acpi Señor Jesucristo tucui pai japistha camachigrichi nisha cachashca runagunamanda ñuca pishi balic mani.¹⁰ Chasna mana ali agllaite Dios ñucata yapa llaquishcamandami ñuca shungüibi pai munashcata rasha, ñucata japistha pai quishpichina shimita yachachichun nisha cachahuara. Chasna racpi mana ñuca quiquin ushaihuanzhu chasna tucuraní randi Dios llaquic asha ñucahuan ashcamandami tucui chi shuc japistha runagunamanda yali sinzhita tarabaurani.¹¹ Chasna acpi ñuca tarabacpihuas paiguna tarabacpihuas ishcandi ali an. Chi

shimillata camachinchi, camachicpi quirishcanguichi.

**Huañushea runaguna
causarina maunguna**

¹²Cristo huañushcamanda causarishcata camachinchi. Chasna camachisha yachachicpiga imahuacta cangunapurai maicangunaga rimanguichi runa huañushcahuasha mana cuti causaringachu nisha.
¹³Huañushcamanda mana causarina acpiga Cristohuas mana causarinmachashca. ¹⁴Náa Cristo mana causarishca acpiga ñucanchi camachina shimiga yanga anma, chasnallata canguna Cristota yanga quiringuichima. ¹⁵Chasna acpiga Diosmanda llullanchima Diosmi Cristotaga causachira nisha. Randi ricuichi, huañushcamanda mana causarina acpiga Dios Cristota mana cuti causachinmachara.

¹⁶Huañushcaguna mana cuti causarina acpiga Cristohuas sirtu mana causarinmachara. ¹⁷Cristo mana causarishca acpiga yanga quirishcanguichima, chara juchayuc anguichima. ¹⁸Chasna acpiga huañushca quiriccunahuas huíñai chingarinaunmara.
¹⁹Astahuanbas cuti causaric Cristota quirishcamanda huiñai pahuan ali causangamiraunchi. Mana chasna acpiga Cristota quiriccuna causanagamalla pai ñucanchita yanapanga nisha tucui runagunamanda yali llaquirishca rimaitucunchima. ²⁰Chasna yuyarillaita Cristo huañushcamanda sirtu causarishcami. Pai ñaupapundapacha causarishami tucui paita quiric huañushcagunahuas causarina ashcataga ricuchiun.

**Puchucaibi Jesucristo
huañuita binsingami**

²¹⁻²²Ñáaupa uras Adan mana alita rashcamanda tucui runaguna huañuituranchi. Chasna agllaita Cristoracumanda causaringamiraunchi mana cuti huañungahua. Yuyarichi, casna man. Shuc runamandallami huañunaga callarira. Chasnallata shuc runamandallami causarinaga callarira.
²³Dios munashca uraspi llambu pahua runaguna causaringaunami. Cristoga punda pallashcacuinta ñaupapunda causaric asha cuti cai munduma shamusha llambu pahua runagunata causachisha pallashcacuinta japiša pushangami.

²⁴Chihuasha tucurina uras pactamungami. Chi uras Cristo shamusha tucuita binsingami. Binsisha tucuchingami tucui amugunata, jatun mandac runagunatas, tucuiba ushaigunatas. Tucui binsishcagunata pahua Yayama cumbirangami, chasna cucpi Yaya Dios llambugunata mandac manga. ²⁵Ricuichi, casnami tucunga. Cristo mandanami anga tucui paita piñaccunata binsinagama. ²⁶Tucui piñaccunata binsisha puchucaibi huañuitaga binsingami.

²⁷Diosca tucuita Cristoma cushcami pai llambugunata mandac tucuchun nisha.

Chasna Diospa shimbí quillcashcami, llambugunata Cristoma cushcami nishallata Yaya Diosmanda mana rimanzhu. Astahuanbas Yaya Diosca Jesucristoma llambugunata cushcamanda pailla mana cushcachan.
²⁸Chasna acpi Yaya Dios illacta pahua churima cushcahuasha Cristoga tucuiginahua gubirnu tucusha llambugunata pahua yayama cutichisha pahuas paillata Diosma

cungami. Chasna tucupci Dios sirtu tucuimanda yali anga.

Causarisheamanda camachicpi turmintachitucuni

²⁹Cuti caita yuyarishun. Huañushca runagunaga mana cuti causaringachu nishaga imangahuata huañushca runata yuyarisha bautisaringuna. Imamandata huañushca runamanda bautisarinaun mana cuti causaricpiga. ³⁰Causarina illacpiga imangahuata tucui uras ñalla huanchitucuna purinchi. ³¹Caran punzha turmintarisha tiyasha sirtumi huañunacuenta ani huauquiguna. Randi canguna Señor Jesucristota quirishcaraicu cushiyasha casnata rimauni. ³²Efeso llactaibi tiyac runaguna yapa mana alitachu rahuanaura piñac pumacuinta. Runa yuyaimandallata yachachishcamanda turmintarishaga yangami turmintarima arani. Huañushcahuasha mana cuti causarina acpiga shuccuna rimacshina caya huañuichari tucuscamanda micushalla upishalla causashunchi nisha quillcashcata rimanchima.

³³Ama umachishca tucunachanguichi. Canguna mana ali runagunahuan purishaga cangunahuas mana ali tucunguchimi nin. ³⁴Juchata saquisha ali puringahua cuti yuyarichi. Ricuichi, maican cangunahuacpi chara Diosta mana yachaccuna tiyaunguna. Chiraicum caita rimani cangunata pingachingahua.

Causarishca aichamanda

³⁵Maican runaga tapunguichimachari imasata huañushca runa cuti causaringa, causarishcahuasha ima tunuta ricuringa. ³⁶Chasna tapusha mana

yuyarisha tapun. Cuti causarishca runa aichaga muyu caracuinta man. Muyu manachu huañusha ismushca tucun. Chasna ashallata manachu huiñasha pangayuc tucun.

³⁷Canguna ima muyutahuas tarpusha sarata inzhictas trigotas tarpusha mana ruyatachu tarpunguichi randi muyugunallata tarpunguichi. ³⁸Ñáa chi muyuguna allpamanda llucshisha Dios ñaupa mandashcacuinta quiquin ruya tucunaun. Caran shucta pahua quiquin pangata cushcami. Shuc muyuga shuc tunu ruya tucun, shucca pahua tunu tucun.

³⁹Chasnallata tucui aichaguna mana shuc tunullachu aunguna, runa aichaga shuc tunu, sacha aichaga shuc tunu, pishcu aichaga shuc tunu, yacuibi tiyac aichaga shuc tunu.

⁴⁰Cai munduibi tiyac aichaga caran tunu aunguna. Chasnallata jahuapachai tiyaccuna caran tunu aunguna. Mundui tiyaccuna ali ricurinaga shuc tunumi, jahuapachai sumac ricurinaga shuc tunumi. ⁴¹Indi quilla estrellascunas punzhayachisha caran shuc chicanda punzhayachin. Caran estrellas chicanda punzhayachin.

⁴²Chicuinta huañushca aicha causarisha chican tucunmi. Huañushcata chingachicpi aichaga ismummi, causarisha mana cuti huañungachu.

⁴³Ismuucta chingachinaun, causarisha ali aicha tucun. Api samiga pambaitucun, ushayucca cuti causarinmi. ⁴⁴Cai mundumanda aichata chingachinaun, jahuapachamanda aicha causaringami. Cai munduibi aicha acta yachasha jahuapachais tiyangaraushcatas yachanchimi.

⁴⁵Diospa shimi caicuinta quillcashca an:

Adan nishca ñaupapunda runa causac ashca.

Chihuasha mushuc Adancuinta runaga Cristo mara. Pai causaita cuc asha runagunata cuti causachinata ushanmi. ⁴⁶Jahuapachamanda runaga cai munduma mana punda shamushcachu randi cai pachamanda runaga punda cai mundui causashcami, chihuasha jahuapachamandami ricurimushca. ⁴⁷Ñáaupapunda runaga allpamanda rashca asha allpayuc ara. Huasha runaga ñucanchi Señor Jesucristo jahuapachamandami ara. ⁴⁸Adancuinta runaguna cai pachamanda aichata chariunguna. Cristohua runaguna paicuinta tucusha jahuapachamanda aichata charinchi. ⁴⁹Ñáucanchi cunan caimanda aichata charishallata huasha jahuapachamanda Cristocuinta aichata charingamirauchi. ⁵⁰Caita rimani huauquiguna. Cai pachamanda rahuaiyuc ismuna aicha jahuapachama Diospagina mana yaicunachu. Yuyarichi. Ismusha tucurina aichaga Dios cushca mana ismuibaccunata japinata mana ushanzhu.

Ñáucanchi aicha cambiaringami

⁵¹Ñáupa mana yachashcagunata cunan cangunata yachachishami. Tucui ñucanchiga mana huañungachu raunchi randi cambiarisha mushuc tucungamirauchi. ⁵²Huairashina ñahui pín rashcallaibi cambiarishca tucungarauchi. Puchuai curmitata tucashcahuauan tucurishcata yachachinga. Chasna chi curmitata tucushcahuauan huañushca quiriccuna llambu causarinaunga mana cuti huañungahua. Chi uras ñucanchi aicha cambiarisha mushuc tucuna angaunami. ⁵³⁻⁵⁴Cai ismuna huañunalla aicha mana cuti huañuna

aichayuc tucunami an. Chimanda Diospa shimibi quillcashcaga pactaringami casna nisha: Dios tucuita binsisha alichingami, paita quiriccuna mana cuti huañunaungachu.

⁵⁵Pundamanda runaguna huañunaushca, chasna ashallata ña mana cuti huañunata ushanaungachu. Ñáupa huañuita manzhac runaguna cunan mana mas manzharinungachu.

Chasna Diospa shimibi quillcashcami sirin. ⁵⁶Diospa shimita mana uyasha juchayuc ashcata riparanau. Juchata rashcamanda taripashcata manzhasha huañunatas manzhanau. ⁵⁷Cunanga randi ñucanchi Señor Jesucristo huañushcamandami Yaya Diosca huañuita binsisha ushaita ñucanchima cun. Chimandami paita yapa cushihuan pagrachu nisha alabashunchi.

⁵⁸Chasna acpi shayarishcashina sinzhita quirisha mana sambayasha tucui uras Yaya Diospa tarabanata raichi llaquishca huauquiguna. Señor Jesucristohuan shuglla tucusheca ashami imatas paihuan racpihuas mana yanga tucungachu. Chitaga alita yachanguichimi.

Diosma cumbirana cullquimanda

16 ¹Ñáa mana yapa charic quiriccunama yanapasha cumbirana cullquita japinamanda rimashami. Galacia llactaibi tiyac quiriccunata ñuca rimashcacuaintallata cangunahuas rana manguichi.

²Caran domingo punzaibi caran amu Dios canda cushcamanda chicanyachisha huacaichinami. Yali ganac runaga yali cumbiranami. Ñáuca cangunahuagma pactacpi tucui

ñupa chicanyachisha huacaichishcata tandachinata ushanguichi. Chasna racpi ñuca tiyangaraushca uras chita jipinata mana minishtinguichichu.
³Náuca chibi pactasha canguna Diosma cumbirana cullquita japisha Jerusalenbi tiyac pugri quiriccunama cachashami. Cangunaga shuc (1) runata ishcaita (2) canguna muntunmanda japicpi chi cullquita apanauchun nisha. Chasnallata ñuca quillacashca ricsichina cartata apanauchun quiric huauquigunama cungahua. ⁴Náucahuas rinata balicpiga paiguna ñucahuan rinauchun.

Pablo pasiana uras

⁵Náupapunda provincia Macedonia llactagunama pasiashcahuasha cangunahuagma shamushami. ⁶Chasna shamusha ashca punzhagunatachari, tucui sanjuan uraspichari, cangunahuan saquirisha. Chihuasha ñuca maibis ricpi cangunaga yanapasha cushihuan cachahuanguichi. ⁷Huashaga Dios munacpi ashca punzhagunata cangunahuan saquirisha nini. Randi cunanga timpu illacpi cangunata pasashami shuc ratullata pasianata mana munasha. ⁸Cunanga Efeso llactaibimi saquiringarauni Pentecostes jista punzhagama. ⁹Cai Efeso llactaibi ashca runa Diospa shimita yapa yachanata munanaupi ñuca yapa tarabana mani. Chasna agllaita ashca runaguna ñuca yachachinata mana munasha jarcachinata munanaun.

Timoteomanda, Apolosmanda

¹⁰Timoteo cangunahuagma pactaci cushionhuan jipichi pai mana manzharishca tucungahua. Paihuas ñucacuinta Diospa tarabanata raun.
¹¹Chimanda ama pihuas paita yanga

mangui nisha rimachinguichichu astahuuanbas paita yanapasha ñucahuagma cuti cachamunguichi. Chi shuc quiric huauquigunahan pariu pai shamunata chapauni.

¹²Apolosta yapa rugarani chi shuc quiriccunahuan cangunahuagma pariu pasigringui nisha randi cunan mana munarachu. Huasha pai ushashcaibi shamungami.

Alita quirisha sinzhiyaichi

¹³Yuyarichi. Diosta sinzhita quirisha ama juchai urmaichichu. Manachu cari anguichi. Chasna asha Diospa ushaihuan sinzhiyaichi mana manzharisha. ¹⁴Imata rashahuas tucuigunata llaquishami raichi.

Dispirishca

¹⁵Alimi huauquiguna. Canguna yachanguichi provincia Acayaibi Estéfanascuna punda quiriccuna auta yachanguichi. Tucui uras quiriccunata yapa yanapangahua tarabasha causanaunmi. ¹⁶Chiraicu paigunacuinta runagunata balichisha uyaichi. Llambu Señor Jesucristota sirbisha tarabac runagunata alita uyaichi. ¹⁷Estéfanas Fortunatondi Acaicondi cangunahuagmanda caima shamushcamanda cushiyani. Canguna caruibi causasha mana ushashcamanda paiguna randi ñucanchita cushiyachinaura. ¹⁸Náucanchita ahuantachishcacuinta cangunatahuas chasnallata ahuantachingaunami. Chasna rac runagunataga llaquina manguichi.

¹⁹Asiaibi tiyac llactagunaibi causac quiriccuna cangunama saluduta cachanaun. Quiric huauqui Aquilo paihua huarmi Prisilandi paihua huasibi tandanauc quiriccunandi Señor Jesucristohua shutibi

cangunama yapa saludanagunata
cachanaun. ²⁰Tucui caibi tiyac
quiric huauquiguna panigunas
cangunata saludanaun. Cangunapura
pariumanda yapa llaquishcahuan
saludaichi. ²¹Náuca quiquin
maquihuan quillcashsha saludauni
Pablo sirtu quillcashcata canguna
yachangahua.

²²Maican Señor Jesucristota mana
llaquic runata Dios taripasha jichuchun.
Señor Jesus uctalla shamuchun.

²³Señor Jesus tucui cangunata
llaquisha alita rachun nishami
tapuni. ²⁴Náucanchi Jesucristohuan
shuglla ashcamanda tucui cangunata
llaquini.

Chillata quillcani. Pablo.